

萬有文庫

第二集七百種

王雲五主編

廣羣芳譜

(五十)

清聖祖敕撰

商務印書館發行

廣羣芳譜卷第六十四

果譜

橘花附見

圓橘本草云橘從喬音鷗諧聲也又雲五色為慶二色為喬喬雲外赤內黃非煙非霧郁一名木奴詳見後

陽香鬱紛紛之象橘實外赤內黃剖之香霧紛紛郁有似乎喬雲橘之從喬又取此意也

舊傳樹高丈許枝多刺生莖間葉兩頭尖綠色光面闊寸餘長二寸許四月生小白花清香可人結實如柚而小至冬黃熟大者如杯包中有瓣瓣中有核實小於柑味甘微酸種類不一有蜜橘其味最甘黃橘扁小

霧橘之綠橘紺碧可愛不待霜後色味朱橘實小色場橘狀大而扁外緣心紅巨包橘外薄內盈其脈上品綠橘已佳隆冬采之生意如春赤如火場橘辦多液經春熟乃甘美包橘辦隔皮可數綿

橘微小極軟美可沙橘細小凍橘八月開花早黃橘秋半穿心橘實大皮光荔枝橘膚理緻密儼如乳橘

狀似乳柑皮堅油橘皮似油飾中堅自然橘他橘與柑必以枝接之惟此則出蘇州台州西出荊州南出

閩廣撫州皆不如溫州者為上也王敬美曰閩中柑橘以漳州為最福州次之樹多接成惟種成者氣味

尤勝橘肉生痰聚飲不益人若煎以蜜充果食甚佳或蜜或薰作餅尤妙亦可醬淹作菹花以之蒸茶向

為龍虎山進御絕品園中宜多種多收核葉皆苦平無毒可入藥

書禹貢厥包橘柚錫貢**傳**小曰橘大曰柚**疏**橘柚二果其種本別以實相比則柚大橘小

【史記貨殖列傳】蜀漢江陵千樹橘。其人與千戶侯等。【謝承後漢書】沛國桓嚴避地居揚州。從事屈豫室中。中庭有橘一株。遇其實熟。數垂室內。嚴以竹藩樹四面。風吹兩實墜地。以繩縛繫樹枝。【吳志陸績傳】績年六歲。於九江見袁術。術出橘。績懷三枚。去拜辭墜地。術謂曰。陸郎作賓客而懷橘乎。績跪答曰。欲歸遺母。術大奇之。【宋書符瑞志】晉成帝咸和六年。鎮西將軍庾亮獻嘉橘。一蒂十二實。孝武帝大明元年二月壬寅。華林園雙橘樹連理。【南齊書虞愿傳】愿字士恭。會稽餘姚人也。祖賚。中庭橘樹冬熟。子孫競來取之。愿年數歲。獨不取。賚及家人皆異之。【梁書元帝本紀】大寶元年正月辛亥朔。左衛將軍王僧辯獲橘三十子。共蒂以獻。【南史孝義傳】王虛之居喪二十五年。鹽酢不入口。墓上橘樹一冬再實。時人咸以爲孝感所致。【舊唐書德宗本紀】大曆十四年五月癸亥。卽位。閏月戊寅。詔江南甘橘歲一貢。以供宗廟。餘貢皆停。【唐書地理志】蘇州杭州温州土貢柑橘。撫州土貢朱橘。【柳玘傳】玘爲嶺南節度副使。麻中橘熟。旣食。乃納直於官。【薛戎傳】戎遷浙東觀察使。所部橘未貢。先鬻者死。戎弛其禁。【宋史五行志】明道元年八月。黃州橘木及柿木連枝。【山海經】荆山銅山葛山。賈超之山。洞庭之山。其木多橘櫟。【春秋運斗樞】璇樞星散爲橘。【晏子春秋】晏子使楚。楚王進橘置削。晏子併食不剖。王曰。橘當剖。對曰。臣聞賜人主前者。瓜桃不削。橘柚不剖。今者萬乘無教。故不敢剖。臣非不知也。【莊子】檀梨橘柚。其味相反。而皆可於口。【韓非子】夫樹橘。

柚者食之則美。嗅之則香。【呂氏春秋】果之美者。有江浦之橘。【淮南子】橘柚有鄉。橘凋於北。徙。榴鬱於東移。【神異經】東方裔外有建山。其上多橘柚。【崔寔正論】橘柚之實。堯舜不常御。【鹽鐵論】匹夫莫乘堅良。而民厭橘柚。橘柚生于江南。而民皆甘之于口者。味同也。【三輔黃圖】扶荔宮有甘橘百餘本。【吳志】吳王餽魏文帝大橘。帝詔羣臣曰。南方有橘。酢。正裂人牙。時有甜耳。【吳錄】朱光祿爲建安郡。中庭有橘。冬月于樹上覆裹之。至明年春夏。色變青黑。味尤美。【益都耆舊傳】楊由爲成都文學掾。少治易。曉占候。忽有風起。太守問由。答曰。南方有薦木實者。色黃赤。頃之。五官掾獻橘數苞。【襄陽耆舊傳】吳李衡漢末爲丹陽太守。每欲治家事。妻英習不聽。後密遣客十人。往武陵龍陽泛洲上作宅。種橘千株。臨死勅兒曰。汝母每怒吾治家事。故窮如是。然吾州里有千頭木奴。不責汝食。歲上匹絹。亦當足用爾。【南方草木狀】漢武帝時交趾有橘官。置長一人。秩二百石。主歲貢御橘。吳黃武中交趾太守士燮。獻橘十七。實同一蒂。以爲瑞異。羣臣稱賀。【神仙傳】蘇仙公者桂陽人也。漢文帝時得道。當仙。母曰。汝去之後。使我如何存活。先生曰。明年天下疾疫。庭中井水。簷邊橘樹。可以代養。井水一升。橘葉一枚。可療一人。來年果有疾疫。遠近悉求母療之。皆以水及橘葉。無不愈者。【廣州記】羅浮山有橘。夏熟。實大如李。剝皮噉則酢。合食極甘。【南中八郡志】交趾特出好橘。大且甘。而不可多噉。令人下痢。【拾遺記】條陽山中有白橘花。色翠而實白。大如瓜。香聞數里。【後搜

神記】會稽鄞縣東野有女子姓吳字望子路忽見一貴人儼然端坐卽蔣侯像也因擲兩橘與之數數形見遂隆情好晉孝武世宣城人秦精常入武昌山中採茗忽遇一人長丈餘徧體皆毛從山北來探懷中二十枚橘與精甘美異常【述異記】勾漏縣有綠橘青柑漢章帝元年前上虞縣獻玉色橘越多橘柚園越人歲出橘稅謂之橙橘戶亦曰橘籍吳闕澤表曰請除臣之橘籍【水經注】劉先主時巴郡結舫水居者五百家縣有橘官夏至則熟二千石常設廚膳命士大夫共會樹下【幽怪錄】巴印橘園中霜後見橘如缶剖開中有二老叟象戲一叟曰橘中之樂不減商山但不得深根固蒂爾一叟取龍脯食之食訖餘脯化爲龍衆乘之而去【異聞錄】柳毅見龍君叩海岸橘樹名橘社【三吳志】孔安國閑宅忽有二人來云自帝庭來一衣綠曰藤子一衣黃曰黃子語吳大帝時事歷歷可聽及去遣人尋之入未央宮庭中衣綠者入於藤下衣黃者入於橘下【風土記】唐于蓬萊殿九月九日賜羣臣橘【江淮異人錄】陳允升好道術撫州危全諷迎賓郡中危夜坐謂之曰豐城橘美頗思之允升曰方有一船泊豐城港今爲取之港去城十五里少選卽還攜一布囊有橘數百枚【稽神錄】僞吳兵部賈潭言其所知爲嶺南節度獲一橘其大如升將表獻之監軍中使以爲非常物不可輕進因取鍼微刺其葉下乃有蠕蠕而動者因破之中有一小赤蛇長數寸【南唐近事】鍾傅鎮江西日客有以覆射之法求謁傅以曆日包一橘致袖中使射之客口占一歌以揭之云太歲當頭立諸神莫敢當其中

有一物常帶洞庭香。【園】廣記劉晏在江淮名橘珍柑常與本道分貢競欲先至雖封山斷道以禁前發晏每厚貲致之爲諸道冠。【園】嘉祐雜志橘樹直竦枝葉不相妨蜀人謂之讓木。【東坡楚頌帖】吾性好種植能手自接果木尤好栽橘陽羨在洞庭上柑橘栽至易得當買一小園種柑橘三百本屈原作橘頌吾園若成當作一亭名之曰楚頌。【文昌雜錄】國子朱司業言南方柑橘雖多然亦畏霜每霜時亦不甚收惟洞庭霜雖多仍無所損詢彼人云洞庭四面皆水也水氣上騰尤能辟霜所以洞庭柑橘最佳歲收不耗正爲此爾。【後山詩話】韋蘇州詩云憐君臥病思新橘試摘纔酸亦未黃書後欲題三百顆洞庭須待滿林霜余往以爲蓋用右軍帖中贈子黃甘三百者比見右軍一帖云奉橘三百枚霜未降未可多得蘇州蓋取諸此。【曲洧舊聞】果中結實遲者莫如橘諺云立不踰膝好種橘言其不可待也。【行都紀事】橘園亭在豐樂橋未建都之時此地皆種橘高宗欲親巡就此乘舟創亭其上前臨大河故至今街市傳爲橘園亭。【益公平園集】洞庭楚之巨浸而山在震澤中其產橘柚皆足以冠天下世謂地脈潛通宜哉。【三柳軒雜識】橘花爲雋客。【武夷山志】峯山有仙橘小者如彈丸其皮可食大者如雞卵味尤甘。【園】蘇州府志太湖中洞庭山一名包山道書第九洞天蘇子美記有峯七十二惟洞庭稱雄其間民俗淳樸以橘柚爲常產每秋高霜餘丹葩朱實與長松茂竹相映巖壑望之若圖畫。【嚴州府志】城南十里有山險峻不易登上有羅浮橘一株熟時風飄墮地得者訛爲仙人橘。

【長沙府志】橘洲在善化縣產橘。【常德府志】橘洲長二十里。卽李衡種橘處。【泉州府志】宋寧宗嘉定間永春縣樂山之東有橘一株隨人所食不得持歸或竊懷之則袖中變爲蛇虺。【延平府志】南平縣衍仙山中產橘止可就食或欲攜歸卽迷道不得出。【莆田縣志】碧溪上有仙人巖巖上野橘其實無時得者爲瑞。宋元祐間方亞夫辭蕃皆以九日遊巖人得一橘並登第。

【表】唐劉禹錫爲武中丞謝新橘表臣某言中使某至奉宣聖旨賜臣新橘若干顆特降恩光猥頒慶賜珍踰百果榮比兼金臣伏以丹實初成苞貢爰至芳馨味重方列於御筵雨露恩深忽霑於賤品感同推食事等絕甘豈惟適口爲珍實冀捐軀上答臣無任感戴之至。

【啓】梁簡文帝謝勅賚城邊橘啓結根壘首垂陰陽壟甘踰石蜜味重金衣暉章標李豈止稱於晉世上林美棗非獨高於漢日。【劉潛謝東宮賜城傍橘啓】多置守民晉爲厚秩坐入縑素漢譬封君固以仰匹穰橙俯聯楚柚寧似魏瓜借清泉而得冷豈如蜀食待飴蜜而成甜重以倒影陽池垂華金堞信可珍石榴於式乾貴葡萄於別館。【劉峻送橘啓】南中橙橘青鳥所食始霜之日採之風味照座劈之香霧噴人皮薄而味珍脈不粘膚食不留滓甘踰萍實冷亞冰壺可以熏神可以萋鮮可以漬蜜羶鄉之果寧有此耶。【庾肩吾謝賚橘啓】光分璇宿影接銅峯去青鳥之迢遞服朱闥之爽塏楚原洪筆頌記不遷陳王麗藻賦稱遙植。

【雜著】原唐陸龜蒙蠹化橘之蠹大如小指。首負特角。身蹙蹙然。類蝓蟻而青。翳葉仰齧。如饑蠹之速。不相上下。人或根觸之。輒奮角而怒。氣色桀驚。一旦視之。凝然弗食。弗動。明日復往。則蛻爲蝴蝶矣。力力拘拘。其翎未舒。猶黑講蒼。分朱間黃。腹瑱而橢。綵織且長。久醉方寤。羸枝不揚。又明日往。則倚薄風露。攀緣草樹。聳空翅輕。瞥然而去。或隱蕙隙。或留篁端。翩旋軒虛。颺曳紛拂。甚可愛也。須臾犯螫網而膠之。引絲環纏。牢若琴枳。人雖甚憐。不可解而縱矣。噫。秀其外。類其文也。默其中。類其德也。不朋而游。類潔也。無嗜而食。類廉也。向使前不知爲橘之蠹。後不見觸螫之網。人謂之鈞天帝居而來。今復還矣。天下大橘也。名位大羽化也。封略大蕙篁也。苟滅德忘公。崇浮飾傲。榮其外而枯其內。害其本而窒其源。得不爲大螫網而膠之乎。觀吾之蠹化者。可以惕已。樂仲子曰。吾昔好種橘。吾種輒前春而植。私竊懼晚也。種而遂者。十不得一二焉。訊之老圃。圃曰。橘不可以前春種也。盍後之。吾從而後之。植而遂者。十嘗得八九焉。又訊老圃。圃曰。冬榮之木。其氣外周。外周者非陽盛不可活也。冬謝之木。其氣內固。內固者雖陽未盛活也。推此則百種百活矣。仲子俯然嘆曰。吾益信枝葩繁者本根墮。周公曰。冬日之閉凍也不固。則春夏之長草木也不茂。天地不能常侈費。而况於人乎。是故君子貴斂其真。不墮其根。萬類以生。

【頌】原楚屈原橘頌。后皇嘉樹。橘徠服兮。受命不遷。生南國兮。深固難徙。更壹志兮。綠葉素榮。紛其可喜兮。曾枝剌棘。圓果搏兮。青黃雜揉。文章爛兮。精色內白。類可任兮。紛緼宜修。姤而不醜兮。嗟爾幼志。有

以異兮。獨立不遷。豈不可喜兮。深固難徙。廓其無求兮。蘇世獨立。橫而不流兮。閉心自慎。不終失過兮。秉德無私。參天地兮。願歲並謝。與長友兮。淑離不淫。梗其有理兮。年歲雖少。可師長兮。行比伯夷。置以爲像兮。【增】宋孝武帝芳春琴堂橘連理頌。列訪神祕。詳觀瑞策。通柯竦秀。實靈所錫。雜條別幹。淹一榮戚。道彼遐方。承我正曆。

【贊】晉郭璞橘櫟贊。厥包橘櫟。奇者維甘。朱實金輝。葉蒨翠藍。靈均是詠。以爲美談。

【賦】魏曹植橘賦。有朱橘之珍樹。於鶉火之遐鄉。稟太陽之烈氣。嘉杲日之休光。體天然之素分。不遷徙於殊方。播萬里而遙植。列銅雀之園庭。背江洲之暖氣。處玄朔之肅清。邦換壤殊。爰用喪生。處彼不凋。在此先零。朱實不御。焉得素榮。惜寒暑之不均。嗟華實之永乖。仰凱風以傾葉。冀炎氣之可懷。颺鳴條以流響。希越鳥之來栖。夫靈德之所感。物無微而不和。神蓋幽而易激。信天道之不訛。旣萌根而弗榦。諒結葉而不華。漸玄化而不變。非彰德於邦家。附微條以歎息。哀草木之難化。【晉潘岳橘賦并序】余齋前橘樹。冬夏再熟。聊爲賦云爾。嗟嘉卉之芳華。信氤氳而芬馥。旣蒼茸而葳蕤。且參差而櫛蠹。已鬱鬱而冬茂。亦離離而夏熟。至如廣命賓客。歷覽遊觀。三清旣設。百味星爛。炫燁乎玉案。照耀於金盤。故成都美其家園。江陵重其千樹。旣見稱於陸言。亦標名乎馬賦。【宋謝惠連橘賦】園有嘉樹。橘柚煌煌。圓丹可翫。清氣芬芳。受以玉盤。升君子堂。味旣滋而事美。實厥包之最良。【梁吳均橘賦】增枝之木。旣稱英

於綠地金衣之果亦委體於玉盤見雲夢之千樹笑江陵之十闌葉葉之雲共琉璃而並碧枝枝之日與金輪而共丹若乃秋夜初露長郊欲素風賚寒而北來鴈衝霜而南度方散藻於年深遂凝貞於冬暮

【唐可頻瑜洞庭獻新橘賦】洞庭之遠兮巨全楚而連巨吳路悠悠以窮塞波淼淼而平湖遠國之奧壤中華之外區風土所宜兮四方各異珍果斯出兮諸夏或無至於白商謝玄律改風落瑤林寒生窮海枇杷落而將盡荔枝摘而不待然後浮香外散美味中成照斜暉而金色帶曉潤而霜清圓甚垂珠琪樹方而孰可味能適口玉果比而全輕在禹貢非它於周制則那充厥包於林下發使者於江沱穰橙不得而雜楚柚不得而和所獻者皆歎其美所貴者不以其多歲嶢嶢而已晚路崎嶇而自遠齊萬物以盆入離本枝而不返其價可重其味可珍固綠蒂而未變施素錦而猶新茲夕發於南國已朝奉於北辰匪雕飾以自媚實羽翼以因人獻芹者既非其匹敵獻桃者何足以等倫豈比夫江北則枳江陵則淵隨檀梨而莫遂備職貢而無由同碩果而已矣望君門兮阻修美哉植物斯多結實者衆斯橘也栽則隔乎淮浦生則主乎雲夢獨專美於當年及歲時而人貢

【仲子陵洞庭獻新橘賦】皇帝垂衣裳而洽萬國舞千戚而來九區包之橘柚至自江湖歲以爲常知方物之咸有時而後獻表庭實之何無本其來則風秋洞庭霜落寰海元侯布教下吏旁採碧林冬生大小異名已去霜蒂初辭綠莖然後盛以瀟湘之竹束以江淮之菁背楚塞以西走望秦雲而北征上方端想玄默深居穆清扇鴻鈞而不宰張大樂而無聲閱彼要荒

之貢。得斯華實之英。乃明四目。乃停九歌。朱紱方來。以彰其道。泰碩果可食。以表其時。和時和在乎務本。道泰在乎柔遠。一果熟。知百果之不荒。一方來。知萬方之未晚。橘之名也。則珍。橘之熟也。惟新。越彼千里。獻於一人。丹其實。體南方之正。酸其味。含木德之純。足以附荔枝於末葉。遺檳榔於後塵。然出自荒陬。升聞莫由。煙波無已。歲月空流。豈知夫湮沈可達。職貢可修。辭草澤以孤往。入金門而見收。物之因人也。其則以衆人之象物也。豈不或中。儻草木之可儔。希成名於入貢。【李德裕瑞橘賦并序】清霜始降。聖上命中使賜宰臣等朱橘各三枚。蓋靈囿之所植也。臣伏以渡淮爲枳。由地氣而不遷。吹谷生黍。信陽和之有感。昔漢武致石榴於異國。靈根遐布。此西域柔服之應也。魏武植朱橘於雀園。華實不就。乃吳人未格之兆也。考於前史。昭晰可知。豈非天地同和。羣物效祉。去蠻邦之陋。獲近太陽。感王化之威。更承膏露。草木尙爾。况乎人心。漢宣帝宮館山澤。意有所感。必使近臣賦之。臣幼學爲文。忝列樞近。敢稽首而獻賦曰。美南州之嘉樹。受烈氣於炎德。固一志於殊方。遂不遷於上國。貞枝凝碧。蔚湘岸之夕陰。華實變黃。動江潭之秋色。雜丹楓於溪畔。映綠篠於巖側。翡翠以之列巢。鷓鴣於焉栖息。雖同霑於雨露。竊自得於雕飾。終獲譽於皇明。豈因人之羽翼。感大鈞之獨運。輸造化之玄力。思六合以同風。採孤根而移植。播元氣以茂育。諒英靈之不測。逮乎霜飛文囿。風落秦川。金莖炫燁於朝日。玉樹菁蔥於霽天。峩方壺之翠島。列靈沼之清漣。上蔚檉松。下秀蓀荃。絕朱草與屈軼。擘紫芝與賓連。靈卉必植。而嘉橘在焉。碧葉燭潤。金衣更

鮮。天漢之華星焜耀。閩風之珠樹粲然。香若團於野露。色疑炫於江煙。旣而大官獻新。奇果列筵。非厥包之自遠。何菲陋之莫傳。樹隱方塘。比丹萍之初實。盤映皎月。與赤瑛而共妍。東鄙孤臣。謬塵三事。旣乏和羹之用。猶需可口之味。并食不割。竊愧晏嬰之知。捧之以拜。重感桓榮之賜。庶不朽於雪霜。永酬恩於天地。

【文賦散句】園漢東方朔七諫。斬伐橘柚兮。列樹苦桃。【司馬相如上林賦】橘柚芬芳。【張衡南

都賦】穰橙鄧橘。【李尤七歎】金衣素裏。斑理內充。【德陽殿賦】橘柚含桃。百果成叢。【晉杜預

七規】庶羞旣異。五味代臻。糅以丹橘。雜以芳鱗。【左思蜀都賦】戶有橘柚之園。【傅巽七誨】閩山

朱橘。【陳周弘讓答王褒書】江南燠熱。橘柚冬青。

【五言古詩】園漢無名氏古詩。橘柚垂華實。乃在深山側。聞君好我甘。竊獨自雕飾。委身玉盤中。歷年冀見食。芳菲不相投。青黃忽改色。人儻欲我知。因君爲羽翼。【晉張華橘】橘生湘水側。菲陋人莫傳。逢君金華宴。得在玉几前。【梁簡文帝詠橘】萋萋映庭樹。枝葉凌秋芳。故條雜新實。金翠共含霜。攀枝折縹榦。甘旨若瓊漿。無假存雕飾。玉盤余自嘗。【沈約園橘】綠葉迎露滋。朱苞待霜潤。但令入玉杵。金衣非所恡。【范雲園橘】芳條結寒翠。圓實變霜朱。徙根楚洲上。來覆廣庭隅。【徐摛詠橘】麗樹臨江浦。結翠似芳蘭。焜煌玉衡散。照耀金衣丹。愧以無雕飾。徒然登玉盤。【虞羲橘】衝飈發隴首。朔雪度炎洲。

摧折江南桂。離披漢北楸。獨有凌霜橘。榮麗在中州。從來自有節。歲暮將何憂。【隋李孝貞詠橘樹】嘉樹出巫陰。分根徙上林。白華如散雪。朱實似懸金。布影臨丹地。飛香度玉岑。自有凌冬質。能守歲寒心。

【唐孟浩然庭橘】明發覽羣物。萬木何陰森。凝霜漸漸水。庭橘似懸金。女伴爭攀摘。摘窺礙葉深。並生憐共蒂。相示感同心。骨刺紅羅被。香黏翠羽簪。擎來玉盤裏。全勝在幽林。【杜甫病橘】羣橘少生意。雖

多亦奚爲。惜哉結實小。酸澀如棠梨。剖之盡蠹蝕。採掇爽所宜。紛然不適口。豈止存其皮。蕭蕭半死葉。未忍別故枝。玄冬霜雪積。況乃回風吹。嘗聞蓬萊殿。羅列瀟湘姿。此物歲不稔。玉食失光輝。寇盜尙憑陵。當君減膳時。汝病是天意。吾諗罪有司。憶昔南海使。奔騰獻荔枝。百馬死山谷。到今耆舊悲。【柳宗元

南中榮橘柚】橘柚懷貞質。受命此炎方。密林耀朱綠。晚歲有餘芳。殊風限清漢。飛雪滯故鄉。攀條何所歎。北望熊與湘。【宋范成大手植綠橘十年不花】綠橘生西山。得自髯翁家。云此接活根。是歲當著花。

俛仰乃十霜。垂蠶紛相遮。芳意竟寂寞。枯枝謾槎牙。風土諒非宜。翁言豈予夸。會令返故山。高深謝污邪。石液滋舊根。山英擢新葩。黃團挂霜實。大如螭峒瓜。當有四老人。來駐七香車。【橘園】橘中有佳人。招

客果下遊。胡牀到何許。坐我金碧洲。沈沈翦綵山。垂垂萬星毬。奇采日中麗。生香風外浮。折贈黃團雙。珍逾桃李投。拆開甘露囊。快吸冰泉甌。熱惱散五濁。豈止沈疴瘳。未知商山樂。能如洞庭否。【元楊載橘

中篇】竝海無山林。莽莽皆平疇。君家擇地利。卽此營菟裘。雜樹作藩屏。青紅間綢繆。其中植橘柚。擁蔽

枝葉稠。盛夏開白華。朱實懸高秋。飛霜虐萬物。寒風助颼颼。凌晨察變候。策杖巡維陬。是何黃金多。暴露宜藏收。採摘資衆力。轉輸及他州。子長傳貨殖。謂此同列侯。上充國家賦。下貽篚筥謀。千縑可坐致。何必龍陽州。

【園】明孫齊之謝送橘。美人有嘉樹。結實如黃金。微霜降秋節。芬芳滿中林。采采不盈篋。歲暮遠相尋。緘以尺素書。致以瑤華音。開緘讀素書。字字瑯與琳。把玩不去手。置我高堂陰。恍行洞庭上。秋色瀟湘深。況此東南美。橘頌步高吟。橘柚匪芬芳。荷君芬芳心。

【七言古詩】宋李綱食橘。洞庭一夜天雨霜。橘林綠苞朝已黃。遠題書後三百顆。入手便覺秋風香。黃金爲膚白玉瓠。沈澁深貯甘且芳。雕盤初擘噴清露。冰齒乍嚼流瓊漿。色香氣味紛可喜。下視衆果皆茫茫。嗟余平生愛種此。木奴千樹梁谿傍。只今蒿艾已埋沒。豈敢向日爭熒煌。蓬萊雲氣久寂寞。漢殿無復羅瀟湘。厥包縱有盡酸澀。剖之蠹朽安足嘗。乃知汝病是天意。坐使玉食無輝光。荒山乃爾飫佳品。安得驟褻置錦堂。君不見杜陵野老歌病橘。蕭蕭半死誠可傷。

【范成大清江道中橘園正夥】芳林不斷清江曲。側影入江江水綠。未論萬戶比封君。瓦屋人家衣食足。暑風汎花蘭芷香。秋日籬落明青黃。客舟來遲佳景盡。但見碧樹愁春霜。

【金党懷英題大理評事王元老雙橘堂】朱橘復朱橘。傳分包貢實。煌煌中堂榜奇畫。照公堂前護草碧。公今致養豐祿食。更取蠻珍奉顏色。舉觴一笑三千秋。坐看諸孫索梨栗。

【元謝應芳洞庭胡敬之以余父執之交歲饋新橘凡十有餘年感無以報是用作歌】湖山清氣鍾

而翁生兒亦有古人風。年年送橘拜牀下。甚愧我非龐德公。今年霜落洞庭早。橘熟先於葑田稻。青衣童子黃金丸。橘頭摘來霜未乾。儂家食指百三十分。甘喜得皆波及。嬌癡堪笑兩曾孫。手弄金丸口欲吞。阿翁老饕三噉畢。已教食之還自喫。一枝一枝復一枝。翁有笑聲孫亦哈。枯腸久似長卿渴。甘露適從仙亭來。楚江萍實不可得。華峰藕亦無人識。冷比雪霜甘比蜜。此句真可題此橘。韓子之詩今代無。借作報章揮我筆。懷哉故人家洞庭。七十二峰環翠屏。洛陽秋風塵滿城。莫能污爾雙鞵青。南山不爛黃河清。正須坐閱三千齡。山中舊識諸耆英。煩道老夫多寄聲。

【五言律詩】唐李嶠詠橘萬里盤根植。千株布葉繁。既榮潘子賦。方重陸生言。玉蘂含霜動。金衣逐吹翻。願辭湘水曲。長茂上林園。
【宋楊萬里橘花】花靜何須豔。林深不隔香。初聞何處覓。小摘莫令長。春落秋仍發。梅兼雪未強。縹姿汲寒砌。淺浸一枝涼。不夜非關月。無風也自香。著花能許細。落子不多長。玉糝開猶半。金鬚燃更長。解愁何必醉。遇暑却生涼。
【明吳寬玉汝席上詠橘】來從馬上郎。猶帶洞庭霜。香霧騰金罍。清冰貯赤囊。曾聞書後寫。宜向醉中嘗。愛此非陳紫。能留客滿堂。
【申時行楚頌亭】爲憐湘浦色。聊借洞庭株。有地容嘉樹。無心利木奴。綠苞含露潤。朱實帶霜腴。歲晚留芳潔。還疑挹左徒。

【七言律詩】唐李紳橘園江城霧斂輕霜早。園橘千株欲變金。朱實摘時天路近。素英飄處海雲深。

懼同荆棘愁遷徙。每抱馨香委照臨。憐爾結根宜自保。不隨寒暑換真心。【白居易揀貢橘書情】洞庭
貢橘揀宜精。太守勤王請自行。珠顆形容隨日長。瓊漿氣味得霜成。登山敢惜驚駘力。望闕難伸螻蟻情。
疎賤無由親跪獻。願憑朱實表丹誠。【張彤和揀貢橘】凌霜遠涉太湖深。雙卷朱旗望橘林。樹樹籠
煙疑帶火。山日照日似懸金。行看採掇方盈手。暗覺馨香已滿襟。揀選封題皆盡力。無人不感近臣心。
【周元範和揀貢橘】離離朱實綠叢中。似火燒山處處紅。影下寒林洗綠水。光搖高樹照晴空。銀章自竭
人臣力。玉液誰知造化工。看取明朝船發後。餘香猶尙逐仁風。【皮日休早春以橘子寄魯望】箇箇和
枝葉捧鮮。彩疑猶帶洞庭煙。不爲韓嫣金丸重。直是周王玉果圓。剖似日魂初破後。弄如星髓未銷前。知
君多病仍中聖。盡送寒苞向枕邊。【陸龜蒙襲美以春橘見惠兼之雅篇因次韻酬謝】到春猶作九秋
鮮。應自親封白帝煙。良玉有漿須讓味。明珠無類亦羞圓。堪居漢苑霜梨上。合在仙家火棗前。珍重更過
三十子。不堪分付野人邊。【宋劉克莊橘花】一種靈根有異芬。初開尤勝結丹莢。白於薔蔔林中見。
清似旃檀國裏聞。淡月珠胎明璀璨。微風玉屑撼繽紛。平生荀令薰衣癖。露坐花間至夜分。

【五言絕句】宋梅堯臣前以柑子詩酬行之既食乃綠橘也頃年襄陽人遺柑子辨是綠橘今反自
笑之】昔辨荊州誤。今爲越叟迷。黃柑與綠橘。正似碣砧圭。

【七言絕句】御製盆中橘實甚繁詠此】厥包禹貢自揚州。作頌騷人楚澤留。爭似青條朱實好。移來滿

樹洞庭秋。

【宋韓琦次韻答滑州梅龍圖惠鼎州柑橘】芳訊欣隨客鯉開。雅篇共付木奴來。病翁逢酒惟憂過。更使湘包下滑杯。【曾鞏橘】剖見隋珠醉眼開。丹砂緣手落塵埃。誰能有力如黃犢。盡摘繁星始下來。

【范成大田園雜興】新霜徹曉報秋深。染盡青林作纈林。惟有橘園風景異。碧叢叢裏萬黃金。【朱子次韻呂季克橘堤】君家池上幾時栽。千樹玲瓏亦富哉。荷盡菊殘秋欲老。一年佳處眼中來。【葉

適橘枝詞】蜜滿房中金作皮。人家短日掛疎籬。判霜翦露裝船去。不唱楊枝唱橘枝。【金劉著伯堅

惠綠橘】黃苞猶帶洞庭霜。翠袖傳看綠葉香。何待封題三百顆。只今詩思滿江鄉。【明沈懋孝】洞

庭秋水接三江。正美鱸魚橘柚香。絲管家家明月夜。儂今何事不還鄉。【陳繼儒】睡起難禁酒力加。醉

時隨臥白鷗沙。草堂位置新籬落。蕉葉西邊橘試花。

【詩散句】【唐張九齡】江南有丹橘。經冬猶綠林。【杜甫】青惜峯巒過。黃知橘柚來。此邦千樹橘。

不見比封君。【張籍】野路臨西浦。門前有橘花。【白居易】江陵橘似珠。宜城酒如餠。【宋劉敞】磊

落蠟珠圓。參差金壺裏。頌聲騷客誤。錫貢禹書遲。【李觀】嫩橘摘千苞。肥魚斫千尾。【司馬光】楚

岸橘花香。扁舟泛渺茫。【張舜民】彼美出南國。關山不常有。【晁冲之】荊州持大橘。亦名作黃柑。

【程敦厚】春飛白雪花。秋吐黃金實。香散風前麝。漿寒霜後蜜。【陸游】西窗夕陽暖。摘橘薦新醅。

【金吳激】天南家萬里。江上橘千頭。【唐杜甫】秋日野亭千橘香。玉杯錦席高雲涼。【白居易】楓林橘樹丹青合。複道崇樓錦繡懸。【白居易】掩映橘林千點火。泓澄潭水一盆油。浸月冷波千頃練。苞霜新橘萬株金。【劉禹錫】秋風門外旌旗動。曉露庭中橘柚香。【曹唐】閒依碧海攀鸞駕。笑就蘇君覓橘嘗。【張泌】千里晚霞雲夢北。一洲霜橘洞庭南。【宋丁謂】香於梔子細於梅。柳絮梨花向後開。【劉敞】江南碧木映霜秋。丹實秋香破客愁。【李觀】水仙坐下魚鱗赤。龍女門前橘樹香。【曾鞏】入苞豈數橘柚賤。芼鼎始足鹽梅和。【王珪】黃欺晚菊垂金砌。圓並明珠落翠盤。【王安石】浥霜火齊纍纍熟。嚙露金苞冉冉香。【蘇軾】春夢屢尋湖十頃。家書新報橘千頭。水底笙歌蛙兩部。山中奴婢橘千頭。【孫覲】酒傾白墮杯行玉。橘破黃苞坐飮金。【徐似道】那堪富有千頭橘。便可稱爲四老人。【陸游】麴米春香雖可醉。瀼西新橘尙餘酸。【元李孝光】池上小風花樹午。夜深疎雨橘林秋。【周庾信】甘橘萬頭奴。【唐張九齡】數處橘爲洲。【周瑀】寒深包晚橘。【孫逖】霜多山橘熟。【孟浩然】金子耀霜橘。【岑參】新橘香官舍。庭樹純栽橘。【李白】巖種朗公橘。人煙寒橘柚。【杜甫】橘井尙高齋。天寒橘柚垂。荒庭垂橘柚。【白居易】橘苞從自結。果擘洞庭橘。【劉禹錫】星懸橘柚村。【柳宗元】橘柚當家僮。【韓翃】縣道橘花裏。衣香楚山橘。【孟郊】橙橘金蓋檻。【李商隱】青辭木奴橘。鄧橘未全黃。喜客常留橘。【許渾】寒橘帶霜甘。【韓

【倻】手香江橘嫩。【宋劉筠】三江橘帶霜。江橘富霜秋。林疎丹橘迴。【王珣彦】霜重橘奴肥。

【孫覲】橘圃聚千奴。【陸游】橘包霜後美。【唐杜甫】橘洲田土仍甘腴。【張籍】江南人家多橘樹。

【韓翃】把手閑歌香橘下。【姚合】橘村籬落香潛度。【杜牧】楚香寒食橘花時。【方干】橘枝亞

路黃苞重。【薛能】疊果盤餐丹橘地。【秦韜玉】橘香深處釣船橫。【皮日休】千株橘樹唯沽酒。

橘爲風多玉腦鮮。【韋莊】滿岸秋風吹枳橘。【宋梅堯臣】綠橘黃柑帶葉收。【蘇軾】不容朱橘更

論錢。一點黃金鑄秋橘。【黃庭堅】君家秋實羅浮種。【張耒】清園一洗黃金團。【元周權】洞庭

霜橘包黃銀。【倪瓚】山園細路橘花香。【顧瑛】橘摘並蒂黃金重。

【詞】【宋蘇軾浣溪沙】菊暗荷枯一夜霜。新苞綠葉照林光。竹籬茅舍出青黃。香霧噴人驚半破。清

泉流齒怯初嘗。吳姬三日手猶香。【李璧清平樂】西江霜後。萬點暄晴晝。璀璨寄來光欲溜。正值文君

病酒。畫屏斜倚窓紗。睡痕猶帶朝霞。爲問清香絕韻。何如欲語梅花。【西江月】昨夜十分霜重。曉來

千里書傳。吳山秀處洞庭邊。不夜星垂初徧。好事寄來禪侶。多情將送琴仙。爲憐佳果稱嬋娟。一笑聊

同清宴。

【新論】士有大趣。不修容儀。不惜小檢。而謂之棄人。是見朱橘一子蠹。因翦樹而棄之。覩緝錦一
寸點。乃全匹而燔之。【古今注】蛺蝶大如蝙蝠者。或黑色或青斑。名爲鳳子。一名鬼車。生江南柑橘園

中。【寰宇記】蒼梧土諺曰：郡中柑橘，多被黑蟻所食。人家買黃蟻投樹上，因相鬪，黑蟻死，柑橘遂成。【園】日用本草：橘實同螃蟹食，令人患輭癰。【日用本草】：口渴吐酒，橘瓢上筋膜炒熟煎湯飲，甚效。【種植】：種子及栽，皆可以枳樹截接，或貼接尤易成。宜肥地，至冬須以大糞壅培，則來年花實俱茂。遇旱以米泔灌溉，則實不損落。根下埋死鼠，則結實加倍。物類相感，志云：橘見尸而實繁。涅槃經云：如橘見鼠，其果實多。【園】避暑錄話：橘極難種，吾居山十年，凡三種而三槁。其初移栽皆三四尺餘，一歲便結實，纍然可愛。未幾偶歲大寒，多雪，卽立槁。雖厚以苦覆草擁，不能救也。蓋性極畏寒，而吾居在山之半，又面北，多北風，與平地氣候絕不同。今吳中橘，亦惟洞庭東西兩山最盛。他處好事者，園圃僅有之，不若洞庭人以爲業也。凡橘一畝，比田一畝利數倍，而培治之功亦數倍於田。橘下之土，幾於用篩，未嘗少以瓦甃。雜之田，自種至刈，不過一二耘，而橘終歲耘，無時不使見纖草，地必面南，爲屬級次第，使受日。每歲大寒，則於上風焚糞壤以溫之，吾不如老圃信有之矣。【學圃餘疏】：柑橘產於洞庭，然終不如浙溫之乳柑。閩漳之朱橘，有種紅而大者，云傳種自閩，而香味徑庭矣。余家東海上，又不如洞庭之宜橘，乃土產，蛻花甜蜜，橘二種，却不啻勝之。橘性畏寒，值冬霜雪稍盛，輒死。植地須北藩多竹，霜時以草裹之。又虞春枝不發。【園】灌培：【多能鄙事】：茅灰及羊矢壅之多生實。十一月內將橘樹根寬作盤澆大糞三次，至春用水澆二次，花實必茂。鋪乾松毛中，不近酒處，多不壞。【收藏】：【便民圖纂】：十月後將金橘安錫器。

內。或芝蔴雜之。經久不壞。若橙橘之類。藏菘豆中極妙。弗近米邊。見米卽爛。【橘錄】有人用糖熬橘者。謂之藥橘。入翦灰於鼎間。色乃黑。可以將遠。又橘微損。則去皮以肉瓣安竈間。用火薰之。曰薰橘。置之糖蜜中。味亦佳。【物類相感志】收湘橘。用煮湯錫瓶收之。經年不壞。【山家清供】舊遊東嘉時。在水心先生席上。邊淨居僧送饘。至如錢大。各合橘葉。清香靄然。如在洞庭左右。先生詩曰。不待滿林霜後熟。蒸來便作洞庭香。因謁寺僧曰。采蓮與橘葉搗汁加蜜。和米粉作饘。各各以葉蒸之。市有賣者。特差大耳。

附錄 橘皮

圓橘皮一名陳皮。一名紅皮。去白者名橘紅。未熟而色青者名青皮。凡使勿用柚皮。柑子皮。誤用有害。橘皮乃六陳之一。日用所需。不可不慎。擇橘皮紋細色紅而薄。內多筋脈。其味苦辛。溫柑皮紋粗色黃而厚。內多白膜。其味辛甘。柚皮最厚而虛。紋更粗。色黃。內多膜無筋。其味甘多辛少。橘皮性溫。柑柚皮性冷。柚皮更不可用。橘皮治百病。總是取其理氣燥濕之功。苦能泄能燥。辛能散。溫能和。同補藥則補。同瀉藥則瀉。同升藥則升。同降藥則降。寬膈利氣消痰。極有殊功。他藥貴新。惟此貴陳。又能治魚腥。可作食料。去白者以白酒入鹽洗潤透刮去筋膜曬乾。用青皮色青氣烈。味苦而辛。治之以醋。所謂肝欲散。急食辛以散之。以酸瀉之。以苦降之也。陳皮浮而升。入脾肺氣分。青皮沈而降。入肝膽氣分。一體而二用。青皮最能發汗。有汗者忌用。二皮合用。推陳致新。大益人。忌多用。久服能損元氣。

廣羣芳譜卷第六十五

果譜

柑

圓柑古作柑。開寶本草云：柑未經霜時猶酸，霜後甚甜，故名。一名瑞聖奴。詳見后。生江南及嶺南。閩廣溫

台蘇撫荆爲盛。川蜀次之。樹似橘，少刺，實亦似橘，而圓大。霜後始熟，味甘甜。皮色生青熟黃，比橘稍厚，理

稍粗，而味不苦。惟乳柑山柑皮可入藥。橘實可久留，柑實易腐敗。柑樹畏冰雪，橘樹略可耐。此柑橘之異

也。乳柑出溫州泥山爲最，其味似乳酪，故名。其木婆娑，其葉纖長，其花香韻，其實圓正，其膚理如澤蠟，其

中絕品。海紅柑樹小而實極大，有圍及尺者，皮厚，洞庭柑，出洞庭山，皮細味美，甜柑，類洞庭而大，每顆八瓣，

饅頭柑近帶如饅頭，色青，膚粗，味似石榴，微酸，可耐久，霜時留，平蒂柑，出成都，大如朱柑，類洞庭

之。漬以鹽，始可食。木柑膚理堅頑，瓣大而乏膏，又有白柑沙柑之類。廣志黃柑出珠崖，北

戶錄變柑出新州，有苞大於升者，其皮薄如洞庭之橘，餘柑。雲南志獅頭柑狀如獅頭，而色黃，其

衡州志沅江出佛頭柑霜柑。益部方物略記柑生果渠嘉等州，結實埒於江南，味亦差爲薄云。

園橘錄柑別種有八，橘別種爲十四，橙別種爲五，凡其類合二十有七，而乳柑推第一，故溫人謂乳

柑

柑爲眞柑。謂他皆若假設者。而獨眞柑爲柑爾。且溫數邑俱種柑。而出泥山者。又傑然推第一。【全芳備祖】韓彥直橘錄。但知乳柑出於泥山。獨不知出於天台之黃巖。出於泥山者固奇。出於黃巖者尤天下奇也。【榕城隨筆】漳南產柑橘。其種不一。而顆皆碩大。蘆柑爲最。紅柑次之。蘆柑色稍黃。紅柑則正赤。皆佳種也。三衢所產。似亦當稍讓。連江一種。差小。而味亦甘。當在武陵密橘之列。【園性大寒。治腸胃熱毒。解丹石。止異渴。多食令人脾冷。生痰發癩癬。皮調中下氣。核可作塗面藥。】

【實考】園【謝承後漢書】丹陽張磐。字子石。爲盧江太守。潯陽令嘗餉一奩甘。其小男年七歲。就取一枚。磐奪其甘。外卒以兩枚與之。磐奪兒甘。鞭卒白。何故行賂於吾子。【園】宋書符瑞志。宋文帝元嘉十二年。

二月。南郡江陵庾和園柑樹連理。【園】宋書彭城王義康傳。義康輔政。四方獻饋。皆以上品薦義康。而

以次者供御。上嘗冬月噉甘。嘆其形味并劣。義康在坐。曰。今年甘殊有佳者。遣人還東府取甘。大供御者三寸。【梁書呂僧珍傳】僧珍有大勳。任總心膺。恩遇隆密。莫與爲比。性甚恭慎。每侍御座。屏氣鞠躬。果

食未嘗舉箸。嘗醉後取一柑食之。高祖笑謂曰。便是大有所進。【園】南史張暢傳。孝武鎮彭城。暢爲安

北長史。魏太武求酒及甘橘。暢宣孝武旨。并致螺杯雜粽。太武遣送氈。及九種鹽。并明鼓。又求黃甘。答曰。知更須黃甘。誠非所吝。但會不足。周彼一軍。向給魏主。未應便乏。故不復重付。【唐書地理志】蘇州湖

州溫州台州洪州。土貢乳柑。【園】唐書蕭嵩傳。荊州進黃柑。帝以紫粉包賜之。【園】宋史五行志。康

定元年十月。始興縣柑兩本連理。【南方草木狀】交趾人以席囊貯蟻鬻於市者。其窠如薄絮。囊皆連枝葉。蟻在其中。並窠同賣。蟻赤黃色。大於常蟻。南方柑樹若無此蟻。則其實皆爲羣蠹所傷。無復一完者矣。今華林園有柑二株。遇結實。上命羣臣宴飲於旁。摘而分賜焉。【園】搜神記。南康郡南東望山。有人入山。見山頂有果樹。衆果畢植。行列齊整如人行。甘子正熟。三人共食至飽。乃懷二枚欲出示人。迴旋半日。迷不得歸。聞空中語云。催放雙甘。乃聽汝去。【荊州記】枝江有宜都舊都。江北有甘園。名宜都甘。

【湘州記】州故大城內有陶侃廟。其地是賈誼故宅。誼時種甘。猶有存者。【世說】王丞相儉。節帳下甘果。盈溢不散。涉春爛敗。都督白之。公令舍去。曰。慎不可令大郎知。【五代新說】隋文帝嗜柑。蜀中摘

黃柑。皆以蠟封蒂獻。日久猶鮮。【大唐新語】益州歲進柑子。皆以紙裹之。他時長吏嫌不敬。代以細布。旣而恐柑子爲布所損。每常憂懼。俄有御史甘子布至。長吏以爲推布裹柑事。懼曰。果爲所推。及子布到驛。長吏敍以布裹柑子爲敬。子布初不知之。久而方悟。聞者莫不大笑。【酉陽雜俎】嶺南有蟻大於

秦中馬蟻。結窠於甘樹。甘實時常循其上。故甘皮薄而滑。往往甘實在其窠中。冬深取之。味數倍於常者。

【園】南越志。開元中有神仙持羅浮柑子。種於南樓寺。其後常資進獻。至幸蜀。幸奉天之歲。皆不結實。

【零陵總紀】李直方常第果實。若貢士以柑爲四。【異聞錄】宣宗時。董元素自江南來。上召見。留於翰林中宿。夜召與語。曰。聞公頗有神術。今南中柑橘正熟。公能致之否。對曰。請安一合於榻前。數刻忽有

微風入簾。啓合柑滿其中。奏云。此江陵支縣柑也。他處恐來遲。上嘗之。驚嘆。【開元天寶遺事】明皇食柑千餘枚。皆缺一瓣。問進柑使者。云途中有道士嗅之。蓋羅公遠也。【清異錄】天寶年。內中柑樹結實。帝日與貴妃賞御。呼爲瑞聖奴。【太真外傳】開元末。江陵進乳柑。上以十枚種於蓬萊宮。天寶十載。九月結實。宣賜宰臣。曰。朕於宮中種柑子數株。今秋結實一百五十顆。乃與江南及蜀道所進無別。亦可謂稍異者。乃頒賜大臣外。有一合歡實。上與妃子互相持翫。上曰。此果似知人意。朕與卿固同一體。所以合歡。於是促坐同食焉。因令畫圖傳之於後。宰臣賀表云。雨露所均。混天區而齊被。草木有性。憑地氣而潛通。故得茲江外之珍果。爲禁中之華實。云云。【續仙傳】唐宣宗嘗食柑子。軒轅集曰。臣羅浮山下所植。味踰於此。上歎曰。朕無緣得之。集取御前碧玉甌。覆以寶盤。頃得柑。上食而甘之。【歸田錄】韋臯鎮西蜀。有黃柑一樹。方熟。衆實皆落。惟樹杪一蒂獨存。其大如椀。枝葉滋茂。韋曰。此奇果也。令去蒂尺餘折之。其實蒂自落。有善醫咎殷曰。凡木實未過時。蒂自落。乃實之病也。請鍼驗之。乃引鍼就蒂刺之。其實應手而轉。殷則連下一刺。血濺盈袖。韋大驚。披之。則兩頭蛇也。【燕翼貽謀錄】承平時。温州鼎州廣州皆貢柑子。尚方多不過千。少或百數。其後州郡苞苴權要。負擔者絡繹。又以易腐。多其數以備揀擇。重爲人害。天聖六年四月庚戌。詔三州不得以貢饋爲名。餉遺近臣。犯者有罰。然終不能禁也。今惟溫有歲貢歲饋。鼎廣不復有之矣。【春渚紀聞】章申公父銀青公俞。年七十集賓親爲慶。會有餉柑者。味甘而實極。

瑰大。既食之嘉其種。卽令收核種之後圃。後更食柑十年。【邵氏聞見後錄】柑橘二物。草木書各爲一條。安定郡王以黃柑釀酒。曰洞庭春色。東坡之賦。皆用橘事。豈以橘條下云其類有朱柑乳柑黃柑石柑乎。夫柑無故事。名洞庭春色。亦橘也。【園】詩話。唐上元夜宮人以黃羅包柑。遺近臣。謂之傳柑宴。

【園】表。唐劉禹錫代武中丞謝新柑表。臣某言。中使至奉宣聖旨。賜臣新柑若干顆。猥降殊私。再頒名果。自遠稱貴。以新爲榮。伏以果實旣成。南方有貴。瓊茅合貢。中禁爲珍。方外貢來。人間未覩。黃苞輝穎。雕俎增華。芬芳初佐於天庖。慶賜忽霑於凡口。甘踰萍實。剖食旣同於楚謠。寒比柘漿。析醒何慙於漢史。恩光斯重。尺素彌彰。誓當捐軀。以申上答。無任感戴之至。

【啓】園。梁劉潛謝晉安王賜甘啓。削彼金衣。咽茲玉液。甘踰萍實。冷亞冰壺。立消煩銷。頓除酪酏。追嗤齊相。進不剖之實。遠笑魏君。逢裂牙之味。【園】庾肩吾謝湘東王賚甘啓。名傳地里。遠自武陵之洲。族茂神經。遙聞建春之嶺。王逸爲賦。取對荔枝。張衡製辭。用連石蜜。足使萍實非甜。葡萄猶餽。

【傳】園。宋蘇軾黃甘陸吉傳。黃甘陸吉者。楚之二高士也。黃隱於泥山。陸隱於蕭山。楚王聞其名。遣使召之。陸吉先至。賜爵左庶長。封洞庭君。尊寵在羣臣右。久之黃甘始來。一見拜溫尹平陽侯。班祝令尹。吉起隱士。與甘齊名。入朝久。尊貴用事。一旦甘位居上。吉心銜之。羣臣皆疑之。會秦遣蘇軫鍾離意使楚。楚召燕章華臺。羣臣皆與甘坐上坐。吉拂然謂之曰。請與子論事。甘曰唯唯。吉曰。齊楚約西擊秦。吾引兵踰

關身犯霜露。與枳棘最下者同甘苦。率家奴千人。戰李洲之上。拓地至漢南而歸。子功孰與。甘曰。不如也。曰。神農氏之有天下也。吾剝膚剖肝。怡顏下氣。以固蒂之術獻上。上喜之。命注記官陶弘景狀其方略。以付國史。出爲九江守。宣上德澤使。童兒亦懷之。子才孰與。甘曰。不如也。吉曰。是二者皆居吾下而位吾上。何也。甘徐應之曰。君何見之晚也。每歲大守勸駕。乘傳入金門。上玉堂。與虞荔申栢梅福棗嵩之徒。列侍上前。使數子者。口吐舌縮。不復上齒牙間。當此之時。屬之於子乎。屬之於我乎。吉默然良久曰。屬之於子矣。甘曰。此吾之所以居子之上也。於是羣臣皆服。歲終吉以疾免。更封甘子爲穰侯。吉之子爲下邳侯。穰侯遂廢不顯。下邳以美湯藥。官至陳州治中。

【雜著】**園**明劉基賣柑者言。杭有賣果者。善藏柑。涉寒暑不潰。出之。燁然玉質而金色。置於市。價十倍。人爭鬻之。予買得其一。剖之。如有煙撲口鼻。視其中則乾若敗絮。予怪而問之曰。若所市於人者。將以實籩豆奉祭祀。供賓客乎。將銜外以惑愚瞽也。甚矣哉爲欺也。賣者笑曰。吾業是有年矣。吾業賴是以食。吾軀。吾售之人。取之。未嘗有言。而獨不足子所乎。世之爲欺者。不寡矣。而獨我也乎。吾子未之思也。今夫佩虎符。坐臯比者。洗洗乎干城之具也。果能授孫吳之略耶。峨大冠。拖長紳者。昂昂乎廟堂之器也。果能建伊臯之業耶。盜起而不知禦。民困而不知救。吏姦而不知禁。法斃而不知理。坐糜廩粟而不知恥。觀其坐高堂。騎大馬。醉醇醴而飫肥鮮者。孰不巍巍乎可畏。赫赫乎可象也。又何往而不金玉其外。敗絮其中也。

哉。今子是不察而以察吾柑。予默然無以應。退而思其言。類東方生滑稽之流。豈其憤世疾邪者耶。而託於柑以諷耶。

【頌】**梁宗炳**《甘頌》：煌煌嘉實，磊如景星。南金其色，隋珠其形。

【贊】**晉王升**之《柑橘贊》：節重履險，操貴有恒。二樹保榮，四運齊能。在質惟美，於味斯弘。異分南域，北則枳橙。【宋宋祁《柑贊》：碧葉素葩，厥包之珍。丹裏既披，香液飴津。

【賦】**晉胡濟**《黃甘賦》：惟江南之奇果，資天地之正陽。生殊方之妙域，植朱鳥之遐鄉。處漢之南，背江之陰。左協蘭皋，右接桂林。帶激水之清流，向崇山之高岑。三秋迭運，初寒履霜。照耀原隰，蔭映林荒。若菱華之繡綺，并燭龍之銜金璫。【劉瑾《甘樹賦》：伊冥造之綿綿兮，繼成象於成遇。嗟卉草之森秀兮，將歸

美於甘樹。誕寄生於南楚兮，播萬里而東布。浸冷泉以搖根兮，竦逸條以承露。結密葉以舒蔭兮，滌纖塵以開素。仰清氣以旭晨兮，流惠飈於薄暮。雖飛榮於園沼兮，契巒松之貞趣。時屢遷而彌貞兮，凌寒暑而一度。【宋謝惠連《甘賦》：嘉寒園之麗木，美獨有此貞芳。質葳蕤而懷風，性耿介而凌霜。擬夕霞以表色，指朝景以齊圓。倅萍實乎江介，超玉果於崑山。傾子節兮湘之區，承君玩兮堂之隅。濯雨兮冒霜，長無絕兮芬敷。【宋蘇軾《洞庭春色賦并序》：安定郡王以黃柑釀酒，名之曰洞庭春色。其猶子德麟得之以餉予。戲作賦曰：吾聞橘中之樂，不減商山。豈霜餘之不令，而四老人者游戲於其間。悟此世之泡幻，藏千里

於一斑。舉棗葉之有餘。納芥子其何艱。宜賢王之達觀。寄逸想於人寰。嫋嫋兮秋風。泛天宇兮清閒。吹洞庭之白浪。漲北渚之蒼灣。攜佳人而往游。勒霧鬢與風鬢。命黃頭之千奴。卷震澤而與俱還。糝以二米之禾。藉之三脊之菅。忽雲蒸而冰解。旋珠零而涕漣。翠勺銀罌。紫絡青綸。隨屬車之鷗夷。款木門之銅環。分帝觴之餘瀝。幸公子之破慳。我洗盞而起嘗。散腰足之痺頑。盡三江於一吸。吞魚龍之神姦。

【五言古詩】**陳徐陵詠柑**朱實挺江南。苞品擅珍淑。上林雜嘉樹。江潭間修竹。萬室擬封侯。千株挺荆國。綠葉萋以布。素榮芬且郁。得陳終宴歡。良垂雲雨育。

園唐杜甫阻雨不得歸灤西甘林。三伏適已過。驕陽化爲霖。欲歸灤西宅。阻此江浦深。壞舟百板圻。峻岸復萬尋。篙工初一棄。恐泥勞寸心。佇立東城隅。悵望高飛禽。草堂亂玄圃。不隔崑崙岑。昏渾衣裳外。曠絕同層陰。園柑長成時。三寸如黃金。諸侯舊上計。厥貢傾千林。邦人不足重。所迫豪吏侵。客居暫封殖。日夜偶瑤琴。虛徐五株態。側塞煩胸襟。焉得輟兩足。杖藜出巖嶽。條流數翠實。偃息歸碧潯。拂拭烏皮几。喜聞樵牧音。令兒快搔背。脫我頭上簪。

【宋梅堯臣近有謝師厚寄襄陽柑】子乃吳人所謂綠橘耳。今王德言遺姑蘇者十枚。此真物也。因以詩答。荆州持大橘。亦自名黃柑。忽得洞庭美。氣味何可參。遂生吳洲思。恨不羽翼南。

【和正月六日沈文通學士遺溫柑】禹貢書厥包。未知黃柑美。競傳洞庭熟。又莫永嘉比。適觀隱侯詩。獲此良可喜。誦句擘露囊。香甜冷熨齒。明朝鎖禮闈。何暇醉鄰里。

【陸游過林黃中食柑子有感學宛陵先生體】博士得

千里無異娛。旁側乃知母子意。更遠未嘗隔。我昨往見君。從容弄書冊。藥分臘劑香。茶泛春芽白。主意顧未厭。筐篋自搜索。敢謂甘旨餘。亦及此下客。霜包纔三四。氣可壓千百。重是慈孝物。不敢吐其核。甘寒雖遠齒。悲感已橫臆。半生無歡娛。初不爲湮阨。

【七言古詩】園宋梅堯臣吳太博遺柑子園太學先生欺綠橘。吳興才士與黃柑。黃柑似日勝崖蜜。帶葉初擎翠竹籃。還料楚王曾未識。徒將萍實詫江南。

【五言律詩】園唐杜甫樹間岑寂雙甘樹。婆婆一院香。交柯低几杖。垂實礙衣裳。滿歲如松碧。同時待菊黃。幾回霑葉露。乘月坐胡牀。【甘園】春日晴江岸。千柑二頃田。青雲羞葉密。白雪避花繁。結子隨邊使。開筒近至尊。後于桃李熟。終得獻金門。園宋司馬光黃柑黃金綴縹蒂。搖落楚江涯。采助杯盤勝。羞將橘柚偕。時移香不變。物遠味尤佳。欲種滄洲樹。何年此意諧。

【七言律詩】園唐柳宗元柳州城西北隅種甘樹園手種黃柑二百株。春來新葉徧城隅。方同楚客憐皇樹。不學荊州利木奴。幾歲開花聞噴雪。何人摘實見垂珠。若教坐待成林日。滋味還堪養老夫。園宋楊億慎大詹以吳柑見貺園龍陽休說木奴洲。震澤黃柑占上流。承露玉漿仙掌曙。亞霜金顆洞庭秋。香黏素手吳娃麗。冷滌朝醒楚客愁。應似荔支催入貢。隨河飛鳥逐鳴騶。園韓維襄柑分惠景仁以詩將

之】荊州解綬十經春。廻夢青林遶漢濱。霜氣輕寒催紺實。渚波餘潤作甘津。僧園採掇寧論數。客路奔馳竟占新。雪意垂收高會缺。分金聊助席間珍。【梅堯臣李廷老祠部寄荊柑子】蹋雪衝風馳小吏。帶霜連葉寄黃柑。擘包欲咀牙全動。舉盞逢衰酒易酣。書尾自題知遠意。筆頭親答厭多談。故人莫覓新詩卷。都似嵇康七不堪。【蘇舜欽師黯以彭甘五子爲寄因懷四明園中此果甚多偶成長句以爲謝】憶向江東太守園。猗猗甘樹蔽前軒。風搖玉蘂霏微落。霜發金衣委墜繁。枕畔冷香通醉夢。齒邊餘味滌吟魂。天彭路遠無因得。猶賴君心記舊恩。【蘇軾食甘】一雙羅帕未分珍。林下先嘗愧逐臣。露葉霜枝翦寒碧。金盤玉指破芳辛。清泉蔌蔌先流齒。香霧霏霏欲喫人。坐客殷勤爲收子。千奴一掬奈吾貧。【曾幾謝人分餉洞庭柑】黃柑分得似嘗新。坐我松江震澤濱。想見霜林三百顆。夢成羅帕一雙珍。流雲喫霧眞成酒。帶葉連枝絕可人。莫向君家樊素口。瓠犀微嚙遠山顰。【明陳獻章元眞送柑】溪園十月摘黃柑。歲月將窮致小籃。繞膝痴孫高起舞。百年乳酒正開罈。色香本出梨之右。風味眞無嶺以南。不惜霜根傳藥圃。白頭還解荷長錢。

【五言排律】宋韓琦召赴天章閣觀新柑】雲閣崇先重。霜柑薦瑞新。臨觀紆法從。趨召獨臣鄰。晚實開天意。重榮浹上人。不隨淮枳變。自比禹包珍。廟獻宸心格。親頒聖寵均。從前魁衆果。仙府占長春。

【王十朋薛士昭寄新柑分贈知宗提舶知宗有詩次韻】書後誰題字。鄉人遠寄柑。薦新思起孝。知味戒

相諧客重開。須請兒痴食。更婪柳詩吟。不厭謝賦讀。常耽若蜜萍。難比如拳栗。有慙公家安定法。想見日酣酣。【知宗柑詩用韻頗險。予旣和之。復取所未用之韻。續賦一首三十韻】書閱揚州貢。功觀禹化覃。香苞分橘柚。秋色動江潭。破暑花凝雪。凌寒葉染藍。金衣丹日照。珠寶碧波涵。未上諸侯計。曾聞四皓談。顏歡陸績母。業世李衡男。送客愈吟桂。記時坡詠儋。洞庭誇浙右。溫郡冠江南。節物清霜重。家山綠蒂含。青黃出離落。朱綠耀林嵐。昔貢千金顆。遙馳萬里函。新宜薦寢廟。香可供瞿曇。夔子那能比。羅浮未許參。何人傳黃陸。端類列非聃。在品寧爲四。蒙恩或賜三。鄉情寄初熟。旅況憶幽探。嘉拜親開合。珍藏淨洗甌。行將解印綬。歸種當田蠶。根向橫陽覓。泥尋斥鹵擔。荒蕪耘徑草。封植半溪柑。不用千頭富。聊資一餉湛。茅齋闢杜甫。仙井汲蘇耽。佳境妙餐蔗。閒庭勝蒔荃。雁行三峽荔。奴視四明蚶。欲繼花爲譜。應同柳駐驂。禦偷籬著棘。愁凍灌添泔。掩映青雲葉。光華碧玉簪。釀成浮甕蟻。蒸辟蠹書蟬。護蒂期存乳。留皮欲去痰。恨無親可遺。松慘白巖庵。

【七言排律】園【唐杜甫寒雨朝行視園樹】柴門雜樹向千株。丹橘黃柑此地無。江上今朝寒雨歇。籬中秀色畫屏紆。桃蹊李徑年雖古。梔子紅椒豔後殊。鑱石藤梢元自落。倚天松骨見來枯。林香出實垂將盡。葉蒂辭枝不重蘇。愛日恩光蒙借貸。清霜殺氣得憂虞。衰顏動覓藜牀坐。緩步仍須竹杖扶。散騎未知雲

閣處猿嘯僻在楚山隅。

【七言絕句】宋梅堯臣贈裴直講水梨二顆言太尠答吳甘三顆以爲多走筆呈之。綠橘似甘來太學。大梨如水出咸陽。莫將多少爲輕重。試擘霜包幾瓣香。園。蘇軾戲答王都尉傳柑。侍史傳柑玉座傍。人間草木盡天漿。寄與維摩三十顆。不知薔蔔是餘香。園。蘇轍毛君惠溫柑。楚山黃橘彈丸小。未識洞庭三寸柑。不有風流吳越客。誰令千里送江南。黃庭堅王揚康園。君家秋實羅浮種。已是纍纍半拂墻。莫教兒童酸打盡。要看霜後十分黃。從人求柑。色深林裏風霜下。香著尊前指爪間。書後合題三百顆。頻隨驛使未應慳。花葉夫人宮詞。內人承寵賜新房。紅紙泥窓繞畫廊。種得海柑纔結子。乞求自進與君王。

【詩散句】宋張耒。逢君金華宴。正味百花先。蘇軾。歸來一點殘燈在。猶有傳柑遺細君。黃庭堅。燕南異事真堪紀。三寸黃柑劈永嘉。陳師道。磊落金盤薦糟蟹。纖柔玉指破霜柑。陸游。黃甘磊落圍三寸。赤蟹輪囷可一斤。何限人間堪恨事。黃柑丹荔不同時。唐杜甫。白露團甘子。甘子陰涼葉。登俎黃甘重。破甘霜落指。李頎。柑實萬家香。張籍。夜月紅柑樹。宋司馬光。四郭柑垂蔭。蘇軾。留客薦霜柑。孫觀。黃甘破芳辛。唐韋莊。露和香蒂摘黃柑。宋蘇軾。聞道黃柑常抵鵲。米芾。玉破鱸魚霜破柑。孫觀。釘坐黃甘喫手香。香霧喫手按黃苞。

【詞】**宋晁補之洞仙歌**江陵種橘。尙比封侯貴。何況江濤轉千里。帶天香含洞乳。宜入春盤紅荔子。馳驛風流僅比。齒疎潘令老。怯咀冰霜。十顆金苞漫分遺。記觴前須細認。別有餘甘。從此去。枉却栽桃種李。想相如酒渴對文君。迴不是人間等閒風味。【又】温江異果。惟有泥山貴。驛送江南數千里。半含霜輕。曉霧。曾憶吳姬親贈我。綠橘黃柑怎比。雙親雲水外。遊子空懷。惆悵無人可歸遺。報周郎須念我。物少情多春酒醉。獨勝甜桃醋李。況燈火樓臺近元宵。渾不減當年袖中風味。

【別錄】**橘錄**歲當重陽。色未黃。採之名曰摘青。及經霜之二三夕。遇天氣晴霽。羣以小剪就枝間平蒂斷之。輕置筐筥。護之必謹。懼其香霧之裂則易壞。尤不便酒香。凡採者竟日不敢飲。柑橘宜斥鹵之地。種時高者畦壟溝以泄水。每株相去七八尺。歲四鋤。冬月以泥壅根。夏時以糞溉之。【物類相感志】藏柑子以盆。盛用乾潮沙蓋之。【梅溪詩注】柑橘花蒸之爲香。可辟衣書之蠹。

附錄 佛手柑

【藝海洞酌】佛手柑一名飛瓊。晉鈕酒母與吳國夫人書云。此中果有飛瓊。出自南州。園佛手柑。本草云。木似朱欒。而葉尖長。枝間有刺。植之近水乃生。其實狀如人手。有指有尺餘者。皮如橙柚而厚。皺而光澤。其色如瓜。生綠熟黃。其核細。味不甚佳。而清香襲人。置衣笥中。雖形乾而香不歇。本草云。南人雕鏤花鳥。作蜜煎果食。置之几案。

可供玩賞。若安芋片於蒂。而以濕紙圍護。經久不腐。或擣蒜罨其蒂上。則香更充溢。切片用滾湯衝飲。極香美。第二遍更佳。浸汁洗葛紵。絕勝酸漿。

橙

原橙 牌雅云。橙。柚屬。可登而。成。故字從登。又諧聲也。 一名金毬。一名鵝鵝。 見韓愈孟郊城南聯句。 樹似橘。有刺。實似柚。而香。晚熟耐久。大者如盃。經霜始熟。葉大有兩刻缺。如兩段。皮厚蹙。如沸。香氣馥郁。可薰衣。可萐鮮。可和菹醢。可為醬齏。可蜜煎。可糖製為橙丁。可蜜製為橙膏。可合湯待賓客。可解宿酒速醒。唐鄧問皆有江南尤多。栽植與橘同。多食傷肝氣。發虛熱。同獷肉食。發頭旋惡心。洗去瓢中酸汁。和鹽蜜煎成。貯食止惡心。能去胃中浮氣。惡氣。皮消食下氣。去胃中浮氣。和鹽貯食。止惡心。

園也。 **西京雜記**【上林苑有橙十株】 **石湖集詩注**【燕城外遇數車載新橙。云修貢種之。汴京擷芳園也。】

橙。 **文賦散句**【漢張衡南都賦】穰橙鄧橘。 **晉張協七命**【燁以秋橙。】 **庾闡揚都賦**【黃柑朱橙。】

七言古詩【唐李頎照公院雙橙】種橙夾階生得地。細葉隔簾見雙翠。抽條向長未及肩。泉水遶根日三四。青青何必楚人家。帶雨凝煙新著花。永願香爐灑甘露。夕陽時映東枝斜。南庭黃竹爾不敵。借問

翠羽流蘇出天仗。黃金戲毬相蕩摩。入包豈數橘柚賤。芼鼎始足鹽梅和。江湖苦遭俗眼慢。禁籞尙覺凡木多。誰能出口獻天子。一致大樹凌滄波。

【七言律詩】**原**宋梅堯臣食橙寄謝舍人。洞庭朱橘未弄色。襄水錦橙已變黃。玉臼搗薑憐鱸美。金盤按酒助杯香。雖生南土名猶重。未信中州客厭嘗。欲寄百苞憑驛去。只應佳味怯風霜。

【五言絕句】**贈**宋蘇轍和文與可洋州園亭金橙徑。葉如石楠堅。實比霜柑大。穿徑得新苞。令公憶鱸鱠。

【七言絕句】**原**宋宋祁春日。故鄉寒食茶糜發。百合香醲邸舍深。漂泊江南春欲盡。山橙髣髴慰人心。

【歐陽修橙子】嘉樹團團俯可攀。壓枝秋實漸爛班。朱欄碧瓦清霜曉。粲粲繁星綠葉間。【蘇軾贈景文】荷盡已無擎雨蓋。菊殘猶有傲霜枝。一年好景君須記。正是橙黃橘綠時。【和文與可洋州園亭金橙徑】金橙縱復里人知。不見鱸魚價自低。須是松江煙雨裏。小船燒薤擣香齏。【黃庭堅鄒松

滋寄橙麪】天將金闕眞黃色。借與洞庭霜後橙。松滋解作逡巡麪。壓倒江南好事僧。【劉子翬食橙

橙橘甘酸各效能。南包錫貢不同升。果中亦抱遺才嘆。有客攀條氣拂膺。常懷細雨初移日。著子已見清霜濟。絕憐面有貴人色。偶致吾儕樽俎間。橙薤細縷風韻勝。我不痛飲那知音。何如金丸走衾枕。三

月夢遊薈葡林。自從天籙守吏散。老樹零落煙雲淒。今朝我爲作知己。小摘秋風黃欲齋。花盜泛蜜小劑供。極有痛快塵邪功。生枝滋味雖可口。流品故應甘下風。

【詩散句】**陸游**唐李白青橙拂戶牖。白水流園池。【宋蘇軾】西風初作十分涼。喜見新橙透甲香。

【陸游】臥聽牀頭壓酒聲。起行籬下摘新橙。【唐杜甫】細雨更移橙。霜橙壓香橘。【孟郊】鵝

鵝攢瓊橙。【張籍】溪寺黃橙熟。【張蠙】別鳥垂橙實。【宋張耒】霜橙共我鄉。【戴復古】搓橙滿

袖香。【元周靈震】園霜未破橙。【宋陸游】雨餘橙子已堪搓。醉歸懷袖有新橙。【明李夢陽】玉

圃新橙摘早霜。

【詞】**陸游**宋史達祖齊天樂。犀紋隱隱鶯黃嫩。籬落翠深偷見。細雨重移。新霜試摘。佳處一年秋晚。荆江未遠。想橘友荒涼。木奴嗟怨。就說風流。草泥來趁蟹螯健。并刀寒映素手。醉魂沈夜飲。曾倩排遣。沈瀛含酸。金罌裹玉。簌簌吳鹽輕點。瑤姬齒輒。待借取團圓。莫教分散。入手溫存。帕羅香自滿。

【別錄】**陸游**山家清供。橙大者截頂去穰。留少液。以蟹膏納其內。仍以帶枝頂覆之。入甑用酒醋水蒸熟。加苦酒入鹽。既香而鮮。使人有新酒菊花香。橙螃蟹之興。因記危齋積贊蟹云。黃中通理。美在其中。暢於四肢。美之至也。此本諸易。而與蟹得之矣。今於橙蟹又得之矣。

而鬆虛。雖味短而香芬大勝。置衣笥中。經旬猶香。古作五和糝用之。

【實錄】南方草木狀。枸櫞子肉甚厚。白如蘆葍。女工競雕鏤花鳥。漬以蜂蜜。點以燕檀。巧麗妙絕。無與

爲比。秦康五年。大秦貢十缶。帝以三缶賜王愷。助其珍味。夸示於石崇。【學圃餘疏】香櫞花酷烈。甚於

山礬。結實大而香。山亭前及廳事兩堦皆可植。香櫞雖味酸澀齒。以爲湯則大佳。置實盤中。盈室俱香。

實佳品也。

【別錄】物類相感志。香圓去蒂。以大蒜搗爛。醃蒂上。則滿室香。更以濕紙圍蓋上。香櫞蒂上安芋片。

則不腐。【養痾漫筆】治嗽方甚多。余得一方甚簡。但用香櫞去核。薄切作細片。以時酒同入砂瓶內。煮

令熟爛。自昏至五更爲度。用蜜拌勻。當睡中喚起。用匙挑服甚效。【山家清供】謝益齋奕禮不嗜酒。嘗

自不飲。但能看客之醉。一日晝餘琴罷。命左右剖香圓二杯。刻以花。溫上所賜酒。以勸客。清芬靄然。使人

覺金樽玉罍皆埃壒矣。

金橘花附見

圓金橘一名金柑。橘錄云。金柑在他柑特小。大者如錢。小者如龍目。色似金。一名盧橘。本草云。此橘生時青。盧色黃。熟則如金。故有金

背之。一名夏橘。本草云。此橘冬夏相繼。廣州志謂之夏橘。一名山橘。嶺表傳云。山橘子大如土瓜。一名給客橙。本草云。香芬如

魏王花木志云。蜀有給客橙。似橘而非。若柚而香。亦名盧橘。一名小木奴。見元稹詩。生吳越江浙川廣間。出營道者爲冠。江浙者皮甘肉酸。次之。樹似橘不甚高大。五月開白花結實。秋冬黃熟。大者徑寸。小者如指頭。形長而皮堅。肌理細潤。生則深綠。熟乃黃如金。味酸甘而芳香可愛。糖造蜜煎皆佳。廣人連枝藏之。人膾醋尤香美。

【伊尹書】箕山之東。青鳥之所。有盧橘。夏熟。【歸田錄】金橘產於江西。以遠難致。都人初不識。明道景祐中。始至京師。香清味美。置之樽俎。光采的皪。如金彈丸。溫成皇后好食之。由是價重京師。

【涪翁雜說】司馬相如上林賦曰。黃甘橙棗。玉藻曰。君入門。上介拂橙棗。晉太簇之簇。武陵有一種小橘名棗。疑卽今之金橘。【玉堂雜記】東閣西偏植金橘。逼城根。株不能大。花開時。香滿院。結實雖小而甘。浙中未易得也。【南村輟耕錄】世人多用盧橘。以稱枇杷。按司馬相如游獵賦云。盧橘夏熟。黃柑橙棗。枇杷撚柿。夫盧橘與枇杷並列。則盧橘非枇杷明矣。郭璞注。蜀中有給客橙。冬夏花實相繼。通歲食之。謂卽盧橘也。意者橙橘惟熟於冬。而盧橘夏亦熟。故舉以爲重歟。


【雜著】漢李尤七款。奇宮閒館。廻洞庭門。井幹廣望。重閣柘因。夏屋渠渠。嗟峨合連。前連都街。後據流川。梁王青黎。盧橘是生。白華綠葉。扶疎冬榮。與時代序。孰不墮零。黃景炫炫。眩林曜封。金衣素裹。斑白內充。滋味偉異。淫樂無窮。副以芋柘。豐弘誕節。纖液玉津。旨於飲蜜。


【五言古詩】宋梅堯臣宋次道得廣南金橘爲餉且有詩因和酬。越橘如金丸。爛然已盈篋。誰傳嶺

【七言古詩】宋周必大曾無疑以長韻送金橘時已暮春次韻茶蘼殿春枝滿霜。盧橘熟夏令乃黃。彈丸煌煌照坐光。老叟驚詫見未嘗。客言採果孟冬月。剖竹爲符帶蒼雪。包之赫蹏滿貯中。纏以絲泉外合節。或藏綠豆飲醉翁。或雜寸橐仍緘封。三說未識將誰從。但覺色香新摘同。分甘安能與衆樂。祕方何惜都傳却。已誇指下石化金。仙指併求君勿噓。楊萬里十月四日同諸弟訪三十二叔祖於蓬萊酌酒摘金橘小集誠齋老子不耐靜。偶拄烏藤出苔徑。獨遊無伴却成愁。羣從同遊還起興。每過一家添一人。須臾保社如煙雲。袞裳涉溪溪水淺。著履渡橋橋柱新。蓬萊一點出塵外。南溪裹在千花裏。芙蓉照波上下紅。琅玕繞屋東西翠。權籬竹石重復重。雞鳴犬吠青霞中。蓬萊老仙出迎客。朱顏綠髮仍方瞳。餐菊爲糧露爲醕。染霧作巾雲作屨。欣然領客到仙家。幾盞蓬萊日未斜。更傾山瓢酌仙酒。酒外瓢邊亦何有。偶看小樹雙團欒。碧琉璃葉黃金丸。主人忍喫不忍摘。笑道未霜猶帶酸。小童隨我勇過我。不管仙翁惜仙果。手撓風枝揀霜顆。爭獻滿盤來釘坐。隔水蓬萊看絕奇。蓬萊看水海如池。主人勸客對絕境。不飲令儂坐生癭。何如寄下未盡瓢。留待早梅伴疎影。

【五言律詩】宋梅堯臣劉元忠遺金橘南方生美果。具體橘包微。韓彈有輕薄。楚萍知是非。甘香奉華俎。咀嚼破明璣。欲破蠶鹽腹。盈奩忽我歸。周必大內直以金橘送七兄晝臥玉堂殿。眼看金彈丸。

禹包經歲月。鄭驛助杯盤。黃帶霜前綠。甘移醉後酸。江湖有兄弟。此日憶團圓。

【七言律詩】宋李清臣和賜後苑金橘。苑臣初摘置瑠盤。口勅官恩賜近官。氣味豈同淮枳變。皮膚不作楚梅酸。參差葉藏珠珠。錯落黃金鑄彈丸。安得一株擎雨露。畫圖傳與世人看。

【七言絕句】唐王建宮詞。叢叢洗手繞金盆。旋拭紅巾入殿門。衆裏遙拋金橘子。在前收得便承恩。【宋司馬光席君從於洛城種金橘。今秋始結六實。以其四獻開府。太師招三客以賞之。留守相公

賦詩紀事。依韻繼成五章。】宜春果結洛陽枝。正遇耆朋會客時。更引輕舟倚蘆岸。香秔鮮鱸雅相宜。

圓小香黃珠顆垂。結成洛邑重霜時。相公和氣陶羣物。不是寒溫變土宜。君從好事不知疲。種子成林凡幾時。橘獻帝師三取二。自嘗兩顆且隨宜。物不須多且賞奇。禦寒想見結菴時。江南江北徒虛語。盡信前書是不宜。敵居橘亦自南移。愛護栽培費歲時。前此實成酸苦甚。應由與德不相宜。【黃庭堅

歐陽從道許寄金橘以詩督之。】禪客入秋無氣息。想依紅袖醉氍毹。霜枝搖落黃金彈。許送筠籠殊未來。【范成大燕堂後盧橘一株冬前先開極香。】盧橘花殘細細飛。滿枝晴日鬧蜂兒。霜餘有此香無柰。合與稱題賦小詩。【楊萬里詠蜜金橘。】風餐露飲橘中仙。胸次清於月樣圓。仙客偶移金彈子。蜂王撚

作菊花鈿。【王十朋金橘。】黃柑綠橘未分珍。瑣碎登盤輒獻新。正可呼爲木奴子。不知誰是鑄金人。

【詩散句】唐元稹。金丸小木奴。【宋梅堯臣。】霜苞瓜瓣香。【元馬祖常。】秋高盧橘熟。盧橘團

【歸田錄】金橘若欲久蓄，須於菜豆中藏之，可經時不變。蓋橘性熱，菜豆性涼故也。【便民纂要】金橘將枳棘接之，八月移栽肥地，灌以糞水。

附錄 金豆

【園金豆】一名山金柑，一名山金橘。【橘錄】生山徑間，比金柑更小，形色頗類，結實繁多，肉瓣不可分。止一核，味酸不可食，惟宜植之欄檻中，園丁種之，以鬻於市。【園木】高尺許，實如櫻桃，生青熟黃，形圓而光溜，皮甜可食，味清而香美，可蜜漬。

柚花附見

【園柚】與櫛同，古作櫛，博雅一名條。爾雅云：條，柚。注云：似橙實酢。一名壺甘。本草云：狀如齒，故名。壺，象形也。古今一名臭

橙。桂海虞衡志：爾雅謂之櫛，又曰椴。爾雅云：椴，椴也。大如盂。廣雅謂之鋪柚。本草云：鋪亦壺也。廣州柚實大而

粗，柑橘中下品也。三月開花，奇大，香甚馥郁，實亦如橘，有甘有酸，皮厚而臭，樹葉皆類橙，實有大小二種。

小者如柑如橙，俗呼爲蜜筩，大者如升如瓜，俗呼爲朱欒，有圍及尺餘者，俗呼爲香欒，閩中嶺外江南皆

有之，南人種其核，云長成以接甘橘甚良，又有名文蛋，名仁崽者，亦柚類也。

【列子】吳越之國有大木焉，其名爲櫛，樹碧而冬生，實丹而味酸，食其皮汁，已憤厥之疾，渡淮而

北化而爲枳焉。【呂氏春秋】果之美者有雲夢之柚。【廣志】成都有柚大如斗。

【五言古詩】宋朱子柚花春融百卉茂素榮敷綠枝淑郁麗芳遠悠颺風自遲南國富嘉樹騷人留恨詞空齋對日夕愁絕鬢成絲。

【詩散句】宋范成大橫煙鼻處雞豚社落日濃邊橘柚山。【楊萬里】瓶裏柚花偷觸鼻忽然將謂是燒香。

【橘錄】朱欒作花比柑橘絕大而香就樹採之用箋香細作片以錫爲甑入花一重則實香一重使花多於香仍竅甑旁以溜汗液用器盛之炊畢去花以液浸香再蒸凡三換花始暴乾入甕器蜜盛之他時焚之如在柑林中凡柑橘并金柑皆可切瓣壓去核漬之以蜜金柑著蜜尤勝他品取朱欒核洗淨下土中一年而長名曰柑明年移而疏之又一年木大如小兒拳遇春月乃接取諸柑之佳與橘之美者經年向陽之枝以爲貼去地尺餘細鋸截之剔其皮兩枝對接掬土實其中以防水蕩護其外麻束之過時而不接則花實復爲朱欒矣。【桂梅虞衡志】廣南臭柚皮甚厚染墨打碑可代氈刷且不損紙。

枳花附見

【本草】枳木如橘而小高五七尺葉如橙多刺春生白花至秋成實七八月采爲實九月十月采者爲殼今醫家以皮厚而小者爲枳實完大者爲枳殼。【草花譜】枳殼花細而香聞之破鬱結籬傍種之實

【實考】周禮考工記：橘踰淮而北爲枳。【博物志】：橘渡江而北，化爲枳。今之江東，甚有枳橘。【洛陽伽藍記】：正始寺衆僧房前，高林對牖，青松青檉，連枝交映，多有枳樹，而不中食。

【集藻】五言古詩：唐白居易有木詩：有木秋不凋，青青在江北，謂爲洞庭橘，美人自移植，上受顧盼恩，下勤澆灌力，實成乃是枳，臭苦不堪食，物有似是者，真僞何由識，美人默無言，對之長歎息，中含害物意，外矯凌霜色，仍向枝葉間，潛生刺如棘。

【七言絕句】唐朱慶餘商州王中丞留喫枳殼：万物就中名最遠，只應愈疾味偏佳，若教盡乞人人與，采盡商山枳殼花。【明陳憲章枳殼花】：蓓蕾枝頭春意長，臥看蜂蝶往來忙，不知今日開多少，熏得先生枕席香。

【詩散句】唐雍陶：村園門巷多相似，處處春風枳殼花。【宋陸游】：傍籬叢枳寒猶綠，遶舍流泉夜有聲。老枳垂藤晝尚黑，雛鶯聲作嬰兒嘯。【唐溫庭筠】：枳花明驛牆。【李商隱】：枳嫩栖鸞葉。【宋陸游】：門邊枳作籬。【元段成己】：奇花開芳枳。【王逢】：楓葉殷紅枳實肥。

附錄 枸橘

【本草】：枸橘處處有之，樹葉並與橘同，但幹多刺，三月開白花，青葉不香，結實大如彈丸，形如枳實，而

殼薄不香。【橘錄】色青氣烈。小者似枳實。大者似枳殼。近時難得枳實。人多植枸橘於籬落間。收其實剖乾之。以之和藥。味與商州之枳。幾逼真矣。

廣羣芳譜卷第六十六

果譜

蓮荷花別見花譜

【爾雅】荷芙蕖。其實蓮。【註】謂房也。其中葇。【註】蓮中子也。的中薏。【註】中心苦。【疏】蓮青皮裏白子爲葇。葇中有青爲薏。味甚苦。的薏。【註】卽蓮實。【本草】一名藕實。一名澤芝。【埤雅】花時卽有實。始而黃。黃而青。青而綠。綠而黑。中肉白。內青。心二三分爲苦薏。【園】蓮房成葇。葇在房。如蜂子在窠。六七月。采嫩者。生食脆美。至秋房枯。收之。去黑殼。謂之蓮。肉黑而洗水者。其堅如石。謂之石蓮子。其房大者。謂之百子蓮。味甘平。瀦無毒。交心腎。厚腸胃。固精氣。強筋骨。補虛損。利耳目。除寒熱。治諸血病。熟食良。切碎可作粥飯。生動氣。易脹。宜去心。

【園】拾遺記】周穆王時。西王母來。共玉帳高會。進幌流素蓮。素蓮者。一房百子。凌冬而茂。【圖】宋錄】元嘉十九年。揚州王濬州治後池。有兩蓮。駢生。雙房分體。太始二年。嘉蓮雙葩並實。合跗同莖。生豫州鯉湖。【豫章志】豫章雩都縣有瑞蓮池。池產異蓮。其葉曰雙捲劍脊。其花曰雙頭丫髻。三萼二十四葉。其實曰覆鐘金鈿。移之他處。輒類常種。俗傳雩山倒影所致。【園】酉陽雜俎】歷城北二里有蓮子。

湖魏袁翻曾在湖醯集參軍張伯瑜諮公言向爲血羹頻不能就公曰取洛水必成也遂如公語果成時清河王怪而異焉乃諮公未審何義得爾公曰可思湖目清河笑而然之而實未解坐散語主簿房叔道曰湖目之事吾實未曉叔道對曰藕能散血湖目蓮子故令公思清河歎曰人不讀書其猶夜行二毛之叟不如白面書生

【西陽雜俎】相傳椽子落水爲蓮

【雲仙雜記】三堂使宅有鉤仙池一種蓮子一歲再結實子十雙其花時香兼桃梅萸菊郡人傳分香蓮不論錢

【續世說】後唐馬郁爲祕監時張承業權貴任事與客宴集陳列珍果客無敢先嘗者郁食之必盡承業私戒主者他日郁至惟以乾蓮子置前郁知不可啖韡中出一鐵槌搗碎食之承業大笑速爲易之曰勿敗吾案

【楊氏六帖補】僧齊已與塑匠蔡蟠會于廬山瀑布見一蓮房房已乾其大如筮

【花史】陳豐嘗以青蓮子十枚寄葛勃勃啗未竟墜一子於盆水中明晨有並蒂花開于水面大如梅花勃取置几間數日方謝剖其房各得實五枚如豐來數

國初金箔張嘗於臘月索乾石蓮子亂撒池中頃刻花開滿池香豔可愛翦紙爲舫置水中踏而登焉鼓棹放歌往來花叢俄失所在

【賦散句】漢王逸魯靈光殿賦圓淵方井反植荷蕖發秀吐榮菡萏紛披綠房紫葍窈窕垂珠

【五言古詩】原宋黃庭堅贛上食蓮有感蓮實大如指分甘念母慈共房頭鱗鱗更深兄弟思實中有薏荷拳如小兒手令我憶諸雛迎門索梨棗蓮心政自苦食苦何能甘甘冷恐腊毒素食則懷慙蓮生淤

高啓蓮房聯句與宋琬張孟兼同作】露冷鏡湖秋。啓波涼練塘曉。盤翻綠雪稠。兼錦破朱霞少。新苞顆

微綻。啓餘葩莖尙嫋。瘦繭綴寒蠶。啓尖喙啄青鳥。下惟玉龍眠。兼中有瓊絲裊。擊重柄欲折。啓含深晴尙

宵。啓孤懸類覆杯。兼雙立疑擢表。啓初成欣雨滋。兼漸老怯風掉。啓多子同根榮。啓獨婦專房悄。啓妝卸

失娉婷。啓歌來逢窈窕。啓剖心效諫忠。兼並頭呈瑞兆。啓裹蹄密竅剜。啓魚目微光皎。珠珥落盤多。啓瑤

軫貯囊小。啓空實外莫辨。甘苦中自了。剝殘香滿地。采盡香餘沼。啓雕筵釘戢戢。玉蟲攢擾擾。送看出小

艇。薦喜對清醪。兼新嘗勝江芡。遠覓述水蓼。塞芳想夏初。啓感物傷秋杪。聊茲發吳詠。一覽煙水渺。啓

【七言古詩】唐張籍探蓮曲秋江岸邊蓮子多。採蓮女兒並船歌。青房實圓齊戢戢。爭前競折漾微

波。試牽綠莖下尋藕。斷處絲多刺傷手。白練束腰袖半卷。不插玉釵妝梳淺。船中未滿渡前洲。借問誰家

家住遠。歸時共待暮潮上。自弄芙蓉還蕩槳。【鮑溶采蓮曲】弄舟竭來南塘水。蓮葉映身摘蓮子。暑衣

鮮淨鴛鴦喜。作浪舞花驚不起。殷勤護惜纖纖指。水菱初熟多新刺。

【五言律詩】宋司馬光蓮房蓮房前後熟。供噉不須齊。肉嫩山蜂子。稜深天馬蹄。尙憐餘蕊在。深映

綠荷低。脆美如新採。近根猶帶泥。

【七言律詩】金張懺蓮實水妃擎出紺珠囊。玉笋雕槃喜乍嘗。膚白已攙新藕嫩。心清猶帶小荷香。

鬪餘翠鳥零珍羽。飛盡黃蜂露蜜房。口腹累人良可笑。此身便欲老江鄉。

【五言絕句】宋元宋无羅噴曲王井荷花碧。中藏偶意深。綠房千萬葯。多少可憐心。

【七言絕句】宋黃庭堅鄒松滋寄蓮子湯新收千百秋蓮葯。剝盡紅衣搗玉霜。不假泰同成氣味。跳

珠椀裏綠荷香。無名氏蓮實城中擔上賣蓮房。未抵西湖泛野航。旋折荷花剝蓮子。露爲風味月爲

香。綠玉蜂房白玉蟬。折來帶露復含烟。玻璃盆面冰漿底。醉嚼新蓮一百圓。蜂不禁人採蜜忙。荷花

蕊裏作蜂房。不知玉蛹甘於蜜。又被詩人嚼作霜。山蜂愁雨損蜂兒。葉底安巢更倒垂。只有荷蜂不愁

雨。蠟房仰臥萬花枝。蜂兒來自宛溪中。兩翅雖無已是蟲。不是荷花窠裏蜜。方成玉蛹未成蜂。明

徐賁折蓮子。落盡紅衣見綠房。折來猶帶水雲香。柔絲零落芳心苦。未及秋風已斷腸。園孟淑卿

題采蓮美人圖。綠牕蟬靜日偏長。嬾爇金爐百和香。莫摘池中蓮子看。个中多半是空房。

【詩散句】宋黃庭堅欲煩春筍手。聊爲剝蓮蓬。唐王適湛湛江水見底清。荷花蓮子傍江生。

【宋僧雲隱】刺分玉蛹堆盤脆。嚼破水丸繞齒涼。晉陸雲綠房含青實。唐李正封池蓮折秋房。

【白居易】味苦蓮心小。溫庭筠採蓮蓮有子。曹鄴蓮子房房嫩。宋王琪蠶寒冰繭瘦。

【孫覲】蓮房駢百子。唐杜甫露冷蓮房墜粉紅。宋蘇軾半脫蓮房露壓敲。

【詞】金王茂孫點絳唇折斷烟痕。翠蓬初離鴛鴦浦。玉纖相妒。翻被專房悞。乍脫青衣。猶著輕羅

輕採摘。風淅淅。船頭觸散雙鷓鴣。夜雨染成天水質。朝陽烘出胭脂色。又落又開人共惜。秋風逼。盤中已見新蓮葯。

【開闢原】【種植】種蓮子法。八九月取堅黑蓮子。瓦上磨尖頭。令皮薄。取瑾土作熟泥。封三指長。令蒂頭泥多而重。磨頭泥少而尖。種時擲至池中。重頭向下。自能周正。薄皮在上。易生。數日即出。不磨者。卒不可生。又一法。雞子一枚。開一小孔。去青黃。將蓮子填滿。紙糊孔三四層。令雞抱之。候小雞出。取放煖處。不拘時。用天門冬末硫黃。同肥泥。或酒罨泥。安盆底栽之。仍用酒和水澆。勿令乾。自然生葉。開花如錢。可愛。蓮子磨薄尖頭。浸甃缸中。明年清明取種。開青蓮花。【製用】【酉陽雜俎】石蓮入水必沉。惟煎鹽滷能浮之。

【本草拾遺】石蓮子居山石間。經百年不壞者。人得食之。令髮黑不老。【食療本草】諸鳥猿猴取得石蓮子。不食。藏之石室內。人得三百年者。食之。永不老。又雁食之。糞於田野山巖之中。不逢陰雨。經久不壞。人得之。每旦空腹食十枚。身輕能登高涉遠。服食不饑。石蓮肉蒸熟。去心爲末。煉蜜丸。桐子大。日服三十九。此仙家方也。【本草衍義】清心寧神。用石蓮子肉。於砂盆中擦去赤皮。留心。同爲末。入龍腦點湯服之。【本草綱目】蓮之味甘。氣溫而性瀟。稟清芳之氣。得稼穡之味。乃脾之果也。脾者黃宮。所以交媾水火。會合木金者也。土爲元氣之母。母氣既和。津液相成。神乃自生。久視耐老。此其權輿也。昔人治心

腎不交。有清心蓮子飲。補心腎。益精血。有瑞蓮丸。皆得此理。【清供錄】取嫩蓮房去蒂。又去皮。用井新水入灰煮。一。如芭蕉脯法。焙乾。以石壓令匾。作片收之。蓮葉鬚一名佛座鬚。花開時。采取陰乾。亦可充果食。【陸璣詩疏】蓮葯可磨以爲飯如粟也。輕身益氣。令人強健。又可爲糜。幽州揚豫取備饑年。

藕

【爾雅】荷芙蕖。其本密。其根藕。【註】密乃莖下白藕在泥中者。【陸璣詩疏】幽州謂之光旁。爲光如

牛角。【埤雅】其生應月。月生一節。遇閏輒益一節。【本草綱目】蓮藕荆揚益豫諸處。湖澤陂池皆有

之。以蓮子種者生遲。以藕芽種者最易發。其芽穿泥。成白藕。卽密也。長者至丈餘。五六月嫩時。沒水取之。可作蔬茹。俗呼藕絲菜。節生二莖。一爲藕荷。其葉貼水。其下旁行生藕。一爲菱荷。其葉出水。其旁莖生花。冬月至春。掘藕食之。藕白。有孔有絲。大者如肱臂。長六七尺。凡五六節。大抵野生及紅花者。蓮多藕劣。種植及白花者。蓮少藕佳。白花藕大而孔扁。生食味甘。煮則不美。紅花及野藕。生食味澀。蒸煮則佳。物類相感。志云。以鹽水供食。則不損口。同油燂麩米果食。則無渣。氣味甘平無毒。消食解渴。散血生肌。蒸食開胃。補五臟。實下焦。擣浸澄粉服食。輕身益年。與蜜同食。令人腹臙肥。不生蟲。亦可代糧。

【北史羊敦傳】敦爲衛將軍。廣平太守。雅性清儉。屬歲饑。家餽未至。使人外尋陂澤。採藕根食之。朝廷以其清白。賜穀一千斛。絹一百匹。【拾遺記】周穆王時。西王母來共玉帳高會。進千常碧藕。鬱

【記】光寶寺在西陽門外園中有一海。號咸池。葭芙蓉被岸。菱荷覆水。青松翠竹。羅生其傍。京邑士子。至於良辰美景。來遊此寺。雲車接軫。羽蓋成陰。或置酒林泉。題詩花圃。折藕浮瓜。以爲興適。【國史補】蘇州進藕。其最上者名曰傷荷藕。或云葉甘爲蟲所傷。又云欲長其根。則故傷其葉。近多重臺荷花。花上復生一花。藕乃實中。亦異也。有生花異而其藕不變者。【酉陽雜俎】大曆中。高郵百姓張存。以踏藕爲業。嘗於陂中見旱藕。稍大如臂。遂并力掘之。深二丈。大至合抱。以不可窮。乃斷之中。得一劍。長二尺。色青無刃。存不知寶。邑人有知者。以十束薪獲焉。其藕無絲。【樹萱錄】有碧衣女子詠詩曰。藕隱玲瓏玉。【清異錄】北方蓮實。狀長少味。出藕頗佳。然止三孔。漢語轉譯其名。曰省事三。崔遠家墅在長安城南。就中襖池產巨藕。貴重一時。相傳爲襖寶。又曰玉臂龍。【續仙傳】羅公遠謂中使輔仙玉曰。主上列月華之藕。【集仙錄】花姑女道士黃靈徹也。居石井山。有野象中箭。來投花姑。姑爲拔之。其後每齋。則銜蓮藕以獻。【孫氏談圃】張舜民芸叟責郴州稅。榔多碧蓮。根大如椀。張嘗以墨印於詩稿上。以詫北人。【養痾漫筆】孝宗嘗患痢。衆醫不效。德壽憂之。過宮偶見小藥肆。遣中使詢之曰。汝能治痢否。對曰。專科。遂宣之至。問得病之由。語以食湖蟹多。故致此疾。遂令診脈。曰。此冷痢也。其法用新采藕節細研。以熱酒調服。如其法。杵細酒調。數服卽愈。德壽大喜。就以杵藥金杵。曰。賜之。至今呼爲金杵。曰。嚴防禦家。可謂

不世之遇。

【興】梁劉孝威謝東宮賚藕啓。色華玉樹。味奪瓊漿。根出楊池。聞之僮約。子爲靈散。得自莊篇。楚后江萍。秦公海棗。凡厥水羞。莫敢相輩。

【賦散句】漢司馬相如上林賦。咀嚼菱藕。【子虛賦】其卑濕則生蓮藕。鮪盧。

【五言古詩】宋胡致隆山谷坐上分題賦藕。平生冰雪姿。七星羅心胸。豈無有絲毫。上裨天子聰。而不自薦達。胡爲乎泥中。沉疴正無賴。安得君從容。其子亦可憐。風味如乃翁。【謝邁食藕】人憐淤泥上。出此萬朵蓮。須知淤泥中。有藕大如椽。本清凝冰雪。未豔方嬋娟。玲瓏衆竅通。幻膠數節連。甘寒固不數。却暑最所便。髻奴來城市。負籠至我前。開緘尙帶泥。未嚼先垂涎。霍霍摩霜刀。雷雷挹水泉。切玉墮冷冽。已覺沈痾痊。芰實鬪角紫。鴻頭剝珠圓。秋盤薦此果。頓使二物捐。念此涅不緇。餘品莫爭妍。而能豁憂思。令我心歡然。奇功更耐老。合作飛行仙。

【七言古詩】唐韓愈古意。太華峯頭玉井蓮。開花十丈藕如船。冷比雪霜甘比蜜。一片入口沈痾痊。我欲求之不憚遠。青壁無路難蚤緣。安得長梯上摘實。下種七澤根株連。【宋王安石過食新城藕】

他年過食新城藕。枕藉船中載親友。今年却到經行處。獨坐昏烟對舞柳。甘酸向口無所適。牢落盤餐與尊酒。冰房玉節漫自好。欲御還休涕垂手。曾參官學居常近。陽城離別初不久。人間此願兩未能。西風落

日共回首

【五言律詩】宋蘇轍踏藕春湖柳色黃。宿藕凍猶僵。翻沼龍蛇動。撐船牙角長。清泉浴泥滓。粲齒碎冰霜。莫使新梢盡。炎風翠蓋涼。

【七言律詩】宋劉克莊憶藕昔過臨平邵伯時。小舟就買藕尤奇。如拈玉塵涼雙手。似瀉金莖噀上池。好事染紅無意思。癡人蒸熟減風姿。炎州地狹陂塘少。渴殺相如欠藥醫。元周震震冰盤雪藕清徹冰盤壓蔗漿。酒酣雪藕近華堂。凝寒色映瑤華脆。眞白絲連翠袖香。金掌曾聞承玉露。瓊臺忽見擣玄霜。文園近日眞消渴。莫種蓮根引恨長。明李東陽賜藕祇向名花看畫圖。忽驚仙骨在泥塗。輕同握雪愁先碎。細比餐冰聽却無。郭北芳菲懷故里。江南風味憶西湖。渴塵此夜消應盡。未羨金莖與玉壺。
【于慎行紀賜鮮藕】芙蓉別殿曉風涼。玉井靈根出水香。薦熟方聞開寢廟。賜鮮已見布朝堂。冰絲欲斷蛟人縷。瓊液疑含閬苑霜。憶昨金鰲橋上望。紅衣翠蓋滿銀塘。

【五言排律】唐趙嘏秋日吳中觀黃藕野艇幾西東。清冷映碧空。褰衣來水上。捧玉出泥中。葉亂田田綠。蓮餘片片紅。激波纔入選。就日已生風。御潔玲瓏膳。人懷拔擢功。梯山漫多品。不與世流同。
【宋陶弼藕】萬頃金沙裏。誰將玉節栽。絲應鮫乞與。珠是蚌分來。盤貯冰猶結。刀侵雪易摧。防風骨外折。混沌竅中開。月寺僧家鉢。風亭酒客杯。胸中秋氣入。牙角雨聲回。自媿塵泥賤。得蒙樽俎陪。與君消酷暑。

瓜李莫相猜。

【五言絕句】宋楊萬里詠藕比雪猶緊在。無絲可得飄。輕拈愁欲碎。未嚼已先消。

【七言絕句】宋楊萬里藕荷衣芰製雪爲容。家住雲烟太華峯。外面看來真璞玉。胸中雕出許玲瓏。

【詩散句】唐杜甫公子調冰水。佳人雪藕絲。【李賀】藕花涼露濕。花缺藕根澀。【宋蘇軾】永懷

江陽叟。種藕春滿湖。【宋祁】自是天姿不污著。水深泥濁奈君何。【陶弼】綠房翠子暗相失。紅藕白

絲空自纏。【宋謝朓】秋藕折輕絲。【隋殷黃】藕絲牽作縷。【唐白居易】暖踏泥中藕。【宋范成

大】吳藕鏤冰寒。【唐來鵬】藕穿平地生荷葉。【宋楊萬里】水藕初凝雪一梢。

【別錄原】製用【蜜煎藕】初秋取新嫩者。焯半熟。去皮。切條或片。每斤用白梅四兩。以沸湯一大碗浸一

時。撈控乾。以蜜六兩煎去水。另取好蜜十兩。慢火煎。如琥珀色。放冷入罐收之。【糖煎藕】每大藕五斤。

切碎日曬。出水氣。沙糖五斤。金櫻末一兩。蜜一斤。同入磁器內。泥封閉。慢火煮一伏時。待冷開用。【製

藕粉】取麤藕。不限多少。淨洗截斷。浸三宿。數換水。看極潔淨。撈出碓中搗碎。以新布絞取汁。重搗。以汁

盡爲度。又以密布澄去麤惡物。如稠難澄。以水攪之。看水清卽瀉去。一如造米粉法。【製藕盞】嫩藕梢

隨意切作方塊。如骰子大。就蟹眼湯內。快手焯上。取牽牛花揉汁。淹染片時。投冷熱水中。滌過控乾。以馬

芹鹽花泡湯。入少醋。加蜜作盞。澄冷澆供之。【煮藕】老藕每節。切作兩段。豎鍋中。下水一盞。鹽少許。蓋

藕須斜片則不脫。【收藏】好肥白嫩藕埋陰濕地。可經久。如新欲致遠。以泥裹之。則不壞。

蔗

園甘蔗

齊民要術云。案書傳或爲芋蔗。或干蔗。或肝糖。或都蔗。所在不同。

叢生。莖似竹。內實直理。有節無枝。長者六七尺。短者三四尺。根

下節密。以漸而疎。葉如蘆。而大聚頂上。扶疎四垂。八九月收莖。可留至來年春夏。王灼糖霜譜云。有數種。曰杜蔗。卽竹蔗。綠嫩薄皮。味極醇厚。專用作霜。曰白蔗。一名荻蔗。一名芳蔗。一名蠟蔗。可作糖。曰西蔗。作霜色淺。曰紅蔗。亦名紫蔗。卽崑崙蔗也。止可生啖。不堪作糖。江東爲勝。今江浙閩廣蜀川湖南所生。大者圍數寸。高丈許。又扶風蔗。一丈三節。見日卽消。遇風則折。交趾蔗特醇厚。木末無厚薄。其味至均。圍數寸。長丈餘。取汁曝之。數日成飴。入口卽消。彼人謂之石蜜。多食蔗衄血。燒其滓煙入目。則眼暗。

【晉書文苑傳】顧愷之每食甘蔗。恆自尾至本。人或怪之。云漸入佳境。

【宋書張暢傳】世祖

鎮彭城。跣躐廩南侵。至小市門。曰魏主致意安北。遠來疲乏。若有甘蔗及酒。可見分。世祖遣人荅曰。知行

路多乏。今付酒二器。甘蔗百挺。

【南史宜都王鏗傳】鏗善射。常以棚的太闊。曰終日射候。何難之有。

乃取甘蔗插地百步射之。十發十中。

【南史范雲傳】永明十年。雲使魏。魏使李彪宣命。至雲所。甚見

稱美。彪爲設甘蔗黃甘粽。隨盡絕益。彪笑謂曰。范散騎小復儉之一。盡不可復得。【孝義傳】庾僧彌母

劉好食甘蔗。母亡。僧彌遂不食焉。【唐書南蠻傳】閩婆有蔗大如脛。【神異經】南方有許墟之林。其

高百丈。圍三尺八寸。促節多汁。甜如蜜。啗其汁。令人潤澤。可以節虻蟲。人腹中虻蟲。其狀如蚓。此消穀

蟲也。多則傷人。少則穀不消。是甘蔗能減多益少。凡蔗亦然。【典論】嘗與奮威將軍鄧展共飲。論劍。良

久。謂言將軍法非也。余顧嘗好之。又得善術。因求與余對。時酒酣耳熱。方食甘蔗。便以爲杖。下殿數交。三

中其臂。【江表傳】孫亮使黃門以銀碗并蓋。就中藏吏取交州所獻甘蔗。黃門先恨藏吏。以鼠矢

投錫中。啓言吏不謹。亮呼吏持錫器入。問曰。此器既蓋。無緣有此。若矢先在錫中。當濕。今矢中燥。黃門將

有恨於汝耶。吏叩頭曰。嘗從某求宮中莞蓆。宮席有數。不敢與。亮曰。必是此也。覆問黃門。具首服。【

齊民要術】零都縣土壤肥沃。偏宜甘蔗。味及采色。餘縣所無。一節數寸長。郡以獻御。【清異錄】湖

南馬氏有雞狗坊。卒長能種子母蔗。【清異錄】丘鵬南出甘蔗。啖朝友云黃金額。【談藪】甄龍友

雲卿永嘉人。滑稽辨捷。爲近世之冠。樓宣獻自西掖出守。以首春觴客。甄預坐。席間謂公曰。今年春氣一

何太盛。公問其故。甄曰。以果奩甘蔗知之。根在公前。而未已。至此。公爲罰掌吏。衆訾其狠率。【野史】

盧絳中。疴疾疲瘵。夢一白衣婦人。謂之曰。子之疾。食蔗卽愈。詰朝見鬻蔗者。揣囊中無一錢。惟有唐韻一

冊。請易之。其人曰。吾負販者。將此安用。哀君欲之。遂貽數挺。絳食之。旦而疾愈。【糖霜譜】唐大曆間。有

僧號鄒和尚。跨白驢。登繖山。結茅以居。須鹽米薪菜之屬。書寸紙繫錢緡。遣驢負至市。人知爲鄒也。取平

責可乎。試之果信。自此流傳其法。至末年北走通泉縣靈鷲山龕中。其徒追及。但見一文殊石像。始知爲大士化身。而白驢者乃獅子也。【容齋隨筆】甘蔗只生於南方。北人嗜之而不可得。魏太武至彭城。遣人求酒及蔗於武陵王。郭汾陽在汾上。代宗賜甘蔗二十條。子虛賦所云諸柘也。【羣碎錄】宋神宗問呂惠卿曰。蔗字從庶何也。曰。凡草木種之俱正生。蔗獨橫生。蓋庶出也。故從庶。【瀛涯勝覽】爪哇國有甘蔗。麤大。長可二三丈。【泉南雜志】甘蔗幹小而長。居民磨以煮糖。泛海售商。其地爲稻利薄。蔗利厚。往往有改稻田種蔗者。故稻米益乏。

【魏文帝感物賦并序】南征荊州。還過鄉里。種諸蔗於中庭。涉夏歷秋。先盛後衰。悟興廢之無常。慨然永歎。乃作斯賦云。伊陽春之散節。悟乾坤之交靈。瞻玄雲之翳翳。仰沈陰之杳冥。降甘雨之豐霈。垂長溜之泠泠。掘中堂而爲圃。植諸蔗於前庭。涉炎夏而旣盛。迄凜秋而將衰。豈在斯之獨然。信人物其有之。【晉張協都蔗賦】若乃九秋良期。玄酎初出。黃華浮觴。酣飲累日。挫斯蔗而療渴。共漱醴而含蜜。清津滋於紫梨。流液豐於朱橘。擇蘇妙而不逮。何況沙棠與椰實。

【文賦散句】司馬相如子虛賦。諸柘巴苴。【張衡南都賦】諸蔗薑薑。【晉左思蜀都賦】甘蔗辛薑。陽蔭敷。【梁昭明太子七召】蔗有盈丈之名。

【七言古詩】**園**宋舒亶詠甘蔗。瑤池宴罷王母還。九芝飛入三仙山。空餘絳節留人間。雲封露洗無時閑。節旄落盡何爛斑。野翁提攜出茅菅。吳刀戛戛鳴雙環。截斷寒冰何潺潺。相如賦就空上林。倦遊渴病長相侵。劉伶愛酒真荒淫。狂來欲倒滄溟深。此時一嚼輕千金。壚邊何用文君琴。五斗一石安足斟。坐想毛髮生青陰。蕭瑟甘滋欲誰讓。粗梨橘柚紛殊狀。冷氣相射杯盤上。顧郎不見休惆悵。佳境到頭還不安。詩成雖愧陽春唱。全勝乞與將軍杖。

【詩散句】**園**晉張載。江南都蔗。釀液豐沛。【唐杜甫】茗飲蔗漿攜所有。瓷罍無謝玉爲缸。春雨餘甘蔗。偶然存蔗芋。【**園**】韋應物。薑蔗滂湖田。【韓愈】初味猶噉蔗。【**園**】元稹。甘蔗消殘醉。

【白居易】漿甜蔗節調。【薛能】壓春甘蔗冷。【宋錢惟演】蔗漿銷內熱。【**園**】唐王維。大官還有蔗漿寒。【**園**】韓翃。醒酒猶憐甘蔗熟。【宋陸游】蔗漿那解破餘醒。【金龐鑄】蔗蜜漿寒冰皎皎。【**園**】

【元顧瑛】蔗漿玉椀冰冷冷。

【**園**】**種植**穀雨內。於沃土橫種之。節間生苗。去其繁冗。至七月取土封壅其根。加以糞穢。俟長成收取。雖常灌水。但俾水勢流滿潤濕則已。不宜久蓄。【製用】石蜜卽白沙糖凝結作塊。如石者。輕白如霜者。爲糖霜。堅白如冰者。爲冰糖。以白糖煎化。印成人物之形者。爲饜糖。以石蜜和牛乳酥酪作成餅塊。爲乳糖。以石蜜和諸色果融成塊。爲糖纏糖煎。總之皆自甘蔗出也。蔗糖以蜀及嶺南者爲勝。江東雖有。

玉招魂所謂肺鼈炮羔有柘漿些是也。其後爲蔗餠。江表傳孫亮使黃門就中藏吏取交州所獻甘蔗餠。是也。後又爲石蜜。南史郡志云榨甘蔗汁曝成飴謂之石蜜。本草亦云煉糖如乳爲石蜜是也。後又爲蔗酒。唐書亦土國用甘蔗作酒。雜以紫瓜根是也。唐太宗遣至摩揭它國取熬糖法。卽詔揚州上諸蔗榨瀋。如其劑。色味愈西域遠甚。然只是今之沙糖。蔗之用盡于是。不言作霜。然則糖霜非古也。歷世詩人模奇寫異。亦無一章一言之。惟東坡公過金山寺作詩送遂寧僧圓寶云。涪江與中冷共此一味水。冰盤薦琥珀。何似糖霜美。黃魯直在戎州作頌荅梓州雍熙長老寄糖霜云。遠寄蔗霜知有味。勝於崔子水晶鹽。正宗掃地從誰說。我舌猶能及鼻尖。則遂寧糖霜見於文字者。實始二公。甘蔗所在皆植。獨福塘四明。番禺廣漢遂寧有糖冰。而遂寧爲冠。四郡所產甚微。而顆碎色淺味薄。纔比遂之最下者。亦皆起於近世。唐大曆中有鄒和尚者。始來小溪之繖山。教民黃氏以造霜之法。繖山在縣北二十里。山前後爲蔗田者十之四。糖霜戶十之三。蔗有四色。紅蔗止堪生噉。芳蔗可作砂糖。西蔗可作霜。色淺不甚貴。杜蔗綠嫩。味極厚。專用作霜。凡蔗最困地方。今年爲蔗田者。明年改種五穀以滋息之。霜戶器用曰蔗削。曰蔗鏟。曰蔗凳。曰蔗碾。曰榨斗。曰黍甕。各有制度。凡霜一甕。中品色亦自不同。堆疊如假山者爲上。團枝次之。甕鑑次之。小顆塊次之。沙脚爲下。紫爲上。深琥珀次之。淺黃又次之。淺白爲下。宣和初王黼創應奉司。遂寧常貢

【漢書循吏傳】龔遂爲渤海太守。秋冬課收斂。益畜果實菱芡。【南齊書孝義傳】會稽人陳氏。有三女無男。祖父母年八九十。老耄無所知。父篤癰病。母不安其室。值歲饑。三女相率於西湖採菱蕒。更日至市貨賣。未嘗虧怠。鄉里稱爲義門。多欲取爲婦。【原】南史魚弘傳。弘爲湘東王鎮西司馬。述職西上。道中乏食。緣路採菱。作菱米飯。給所部。弘度之所。後人覓一菱不得。【列子】杜厲叔事荅敖公。自以爲不知己者。居海上。夏日則食菱芡。冬日則食橡栗。【洞冥記】巨露池西有靈池。方四百步。有浮根菱。根出水上。葉沉波下。實細薄。皮甘香。葉半青半黃。霜降彌美。因名青冰菱也。有玄都翠水。水中有菱。碧色。狀如雞飛。名翔雞菱。仙人臯伯子常游翠水之涯。採菱而食之。令骨輕舉。身生毛羽也。【增】列仙傳。老菜子菹菱爲食。【拾遺記】昭帝元始元年。穿菱池中。有倒生菱。莖如亂絲。一花十葉。根浮水上。實沉泥中。名紫菱。食之不老。【廣志】鉅野大菱。大於常菱。淮漢之南。凶年以菱爲蔬。【太康地記】武昌南湖通江。夏有水。冬則涸。於時靡所產植。陶太尉立塘以遏水。常自不竭。因取瑯琊郡隔湖魚菱。以著湖內。菱甚甘美。異於他所。【續豫章記】王鄰隱西山。頂菱角巾。又嘗就人買菱。脫頂巾貯之。歎曰。此巾名實相副矣。【酉陽雜俎】瓜州紅菱。今人但言菱芡。諸解草木書。亦不分別。惟王安貧武陵記。言四角三角曰菱。兩角曰菱。今蘇州折腰菱多兩腳。成式曾于荊州。有僧遺一斗郢城菱。三角而無傷。可以節莎。【廬

【陵詩話】京師賣五岳宮菱。【後山詩話】某守與客行林下，曰栢花十字裂，顧客對其倅晚食菱，方得對云：菱角兩頭尖，皆俗諺全語也。【石湖詩話】蜀中無菱，至蜀州西湖始見之。【老學庵筆記】菱，菱也。今人謂卷荷爲伎荷，伎，立也。卷荷出水面，亭亭植立，故謂之伎荷，或作菱，非是。白樂天池上早秋詩云：荷菱綠參差，新秋水滿池，乃是言荷菱二物耳。【三柳軒雜識】菱花爲水客。【楚辭芳草譜】製菱荷以爲衣兮，集芙蓉以爲裳，蓋菱葉雜選，荷葉博大，有爲衣之象，而芙蓉若可緝者也。【白嶽行記】九月九日，由謝村取餘杭道，曲溪淺渚，被水皆菱角，有深淺紅及慘碧三色，舟行掬手可取，而不設墜塹，僻地淳俗，此亦可見。余酒渴思解，奴子康素工掠食，偶一命之，甚資咀嚼，平生恥爲不義，此其愧心者也。【圓】


【杭州志】東坡知杭州，募民種菱於西湖，收其利以備修隄。

【隄】【啓】梁庾肩吾謝賚菱啓：上林紫水，雜蘊藻而俱浮，雲夢清池，間芙蓉而外發，珍踰百味，來薦畫盤，恩重千金，遂沾菲席，凌霜朱橘，愧此開顏，含露蒲桃，慙其不韻。

【論】【晉孫楚屈建論】加籩之品，菱芡存焉，楚多陂塘，菱芡所生，父自嗜之，而抑按宰祝，旣毀就養，無方之禮，又失奉死如生之義，奪乎素欲，建何忍焉。

【辨】【明楊慎菱芡辨】武陵記：四角三角曰菱，兩角曰菱，其字不一，說文作菱，注曰：楚謂之菱，秦謂之薹，薹，菱也，果也，薹，薹，決明也，菜也，殊已混淆，相如賦：外發芙蓉，陵華則芡實也，又相如凡物篇云：菱從


許慎所注。合是菜也。又國語屈到嗜芰。蓋決明之菜。非水中芰也。審矣。爾雅既以水中之芰釋菜。說文又以菜釋水中之芰。由漢名不一。所以致惑。今按菱今之菱角。芰今之鷄頭。楚辭緝芰荷以爲衣。若是菱葉不可爲衣也。緣楚人名菱爲芰。所以致後世解二物不分。又以決明參之。愈益淆亂。楚人名菱爲芰。見爾雅疏。待此一解。可破前數說之紛紛矣。

【文賦散句】漢司馬相如上林賦。咀嚼菱藕。【魏曹植九詠】遇遊女于水裔。採菱花而結詞。


火。【晉左思蜀都賦】綠菱紅蓮。【郭璞江賦】鱗被菱荷。攢布水蕨。翹莖藻葉。濯款散裹。流光潛映。景炎露

【五言古詩】梁簡文帝採菱曲。菱花落復含。桑女罷新蠶。桂棹浮星艇。徘徊蓮葉南。劉孝綽

詠小兒採菱。採菱非採菘。日暮且盈舸。踟躕未敢進。畏欲比殘桃。【陸罩採菱曲】參差雜荇枝。田田

競荷密。轉葉在香風。舒花影流日。戲鳥波中蕩。遊魚菱下出。不與文王嗜。羞持比萍實。江洪和湘

東王采菱曲。風生綠葉聚。波動紫莖開。含花復含實。正待佳人來。

【七言古詩】唐劉禹錫採菱行。白馬湖平秋日光。紫菱如錦綵鴛翔。盪舟游女滿中央。採菱不顧馬
上郎。爭多逐勝紛相向。時轉蘭橈破輕浪。長鬢弱袂動參差。斂影釧文浮蕩漾。笑語哇哇顧晚暉。蓼花綠

岸扣舷歸。歸來共到市橋步。野蔓繫船萍滿衣。家家竹樓臨廣陌。下有連橋多估客。攜觴薦芰夜經過。醉踏大隄相應歌。屈平祠下沅江水。月照寒波白煙起。一曲南音此地聞。長安北望三千里。【明王鴻漸題菱科圖】采菱科。采菱科。小舟日日臨清波。采得菱來餘幾何。竟無人唱采菱歌。風流無復越溪女。但采菱科救饑餒。

【五言律詩】唐李嶠咏菱。鉅野韶光暮。東平春溜通。影搖江浦月。香引棹歌風。日色翻池上。潭花發鏡中。五湖多賞樂。千里望無窮。【宋蘇轍食菱】野沼漲清泉。烏菱不直錢。蟹肥螯正滿。石破髓方堅。節物秋風早。樽壘夜月偏。令人思淮上。小舫藕如椽。

【七言律詩】宋楊萬里食菱。鷄頭吾弟藕吾兄。頭角嶄然也不爭。白壁中藏煙水晦。紅裳左袒雪花明。一生子木非知己。千載靈均是主盟。每到炎官張火傘。西山未當聖之清。

【五言絕句】唐錢起江行無題。細竹漁家路。晴陽看結罾。喜來邀客坐。分與折腰菱。【宋梅堯臣和資政侍郎採菱】紫角菱實肥。青銅菱葉老。孤根未能定。不及寒塘草。

【七言絕句】唐白居易看採菱。菱池如鏡淨無波。白點花稀青角多。時唱一聲新水調。謾人道是采菱歌。【宋范成大采菱戶】采菱辛苦似天刑。刺手朱殷鬼質青。休問揚荷涉江曲。只堪聊誦楚詞聽。

【田園雜興】采菱辛苦廢犁鋤。血指流丹鬼質枯。無力買田聊種水。近來湖面亦收租。【楊萬里

蟾蜍股樣肥。葉如蝴蝶翼。相差蟾蜍翹。立蝶飛起。便是菱花著子時。

【詩散句】**【梁江淹】**相攜及嘉月。採菱渡北渚。【徐勉】紫菱亦可採。聊以緩愁年。【原】**【費昶】**妾家

五湖口。采菱五湖側。【唐儲光羲】濁水菱葉肥。清水菱葉鮮。【李白】郎聽採菱女。一道夜歌歸。

【杜甫】況資菱芡足。庶結茅茨迴。【錢起】渚禽菱芡足。不向稻梁爭。【劉禹錫】豔歌呈幾曲。江畔采

新菱。【原】**【宋陶弼】**轉葉香隨風。舒花影凌日。【梁武帝】江南稚女。珠腕纏。桂棹容與歌採菱。【唐

李賀】瀉酒木蘭椒葉盡。病容扶起種菱絲。【宋陳堯佐】堆盤菱熟胭脂角。藉藻鱸鮮淡墨鱗。【林

逋】含機綠錦翻新葉。滿篋青銅瑩古花。【陸游】何時却泛耶溪路。臨聽菱歌四面聲。【唐儲光

羲】深潭菱葉疎。【王維】菱蔓弱難定。【原】**【杜甫】**隔沼連香芡。【增】**【杜甫】**水果剝菱芡。採菱寒

刺土。【韓愈】菱葉故穿萍。【孟郊】菱翻紫角利。【柳宗元】朶頤進芡實。【張籍】翻芡紫角稠。

【李益】菱花覆碧渚。【李賀】菱科映青罩。【白居易】菱風香散漫。【宋司馬光】光翻芡葉齊。

【楊萬里】新菱剝曬紅。【唐萬齊融】垂菱布藻如妝鏡。【薛逢】日中漸見菱花舒。【韋莊】十畝菱

花晚鏡清。【曹唐】碧花菱角滿潭秋。【宋王安石】菱角蜻蜓翠蔓深。【陸游】深紅菱角密覆水。

【元薩都刺】酒渴冰盤破紫菱。

【詞】原宋張鑑鵲橋仙連汀接渌縈蒲帶藻萬鏡香浮光滿濕煙吹霽木蘭輕照波底紅嬌翠婉玉
纖探處銀籠攜去一曲山長水遠彩鴛雙慣貼人飛恨南浦離多夢短

【別】原風俗通殿堂象東井形刻為荷菱荷菱皆水物所以厭火也【埤雅】羣說鏡謂之菱花以其

面平光影所成如此庾信鏡賦云照壁而菱華自生是也【爾雅翼】昔人取菱花六觚之象以為鏡

原種植秋間取熟黑者撒池中來春自生【圖】製用【物類相感志】菱煮過以礬湯綽之紅綠如生

煮菱要青用石灰水拌過先洗去灰煮則青

芡

芡一名雞頭古今注云芡雞頭也一名芡方言云北燕謂之菘青徐淮泗之間謂之芡一名雁喙一名

雁頭爾雅翼云葉有芒刺兼有一名雞壅見莊一名卵菱見管一名蔞子本草經註云芡實即

亦名蔞菜一名水硫黃孫公談園云芡甘滑可食名生水澤中處處有之三月生葉貼水大於荷葉皺

文如穀蹙如沸面青背紫俗名雞頭盤莖葉皆有刺莖長丈餘有孔有絲嫩者剝皮可作蔬茹五六月

開紫花結苞外有刺如蝟花在苞頂如雞喙內有斑駁軟肉裹子纍纍如珠璣殼內白米狀如魚目薏苡

大味甘平瀉無毒補中強志聰耳明目開胃助氣止渴益腎除溼痺腰脊膝痛久服身輕不飢耐老莖止

煩渴除虛熱生熟皆宜根狀如三稜煮熟如芋可食治心痛氣結病

字之誤也。蓮芡之實有囊韜。【疏】蓮芡之實有囊韜者。以其是川澤所生。故知是蓮芡之實。皆有外皮。囊韜其實者也。【宋史禮志】太宗景祐三年。禮官宗正請每歲夏季月薦果以芡以菱。【莊子】藥也。其實革也。桔梗也。雞靡也。豕零也。是時爲帝者也。何可勝言。【注】靡或作壅。司馬云。雞靡卽雞頭也。【淮南子】雞頭已瘦。【注】瘦頸腫疾。雞頭水中芡。【東坡雜記】吳子野云。芡實蓋溫平爾。本不能大益人。然俗謂之水硫黃。何也。人之食芡也。必枚嚙而細嚼之。未有多嚼而亟嚙者也。舌頰唇齒。終日嚙嚙。而芡無五味。腴而不膩。足以致上池之水。故食芡者。能使人華液通流。轉相挹注。積其力。雖過乳石可也。

【興藥】七言古詩。【原】唐無名氏雞頭。湖浪參差疊寒玉。水仙曉轉鉢盤綠。淡黃根老栗皺圓。染青刺短金罌熟。紫羅小囊光緊蹙。一掬真珠藏蝟腹。叢叢引鶯傍蓮洲。滿川恐作天雞哭。【宋歐陽修初食雞頭有感】六月京師暑雨多。夜夜南風吹芡嘴。凝祥池瑣會靈園。僕射荒陂安可擬。爭先園客採新苞。剖蚌得珠從海底。都城百物貴新鮮。厥價難酬與珠比。金盤磊落何所薦。滑臺潑醅如玉醴。自慚竊食萬錢廚。萬口飄浮嗟病齒。却思年少在江湖。野艇高歌菱苕裏。香新味全手自摘。玉潔沙磨軟還美。一瓢固不羨五鼎。萬事適情爲可喜。何時遂買穎東田。歸去結茅臨野水。【文同采芡】芡盤圓圓開碧輪。城東濠中如疊鱗。漢南父老舊不識。日日岸上多少人。駢頭鬚鬆露秋熟。綠刺紅鍼割寒玉。提籠當筵破紫苞。老

蚌一開珠一掬。吹臺北下凝祥池。圃田東邊僕射陂。如今兩處盡湮沒。異日此地名應馳。物貴新成味尤美。可惜飄零還入水。料得明年轉更多。一匣清波流珠子。【蘇轍食雞頭】芡葉初生縵如縠。南風吹開輪脫殼。紫苞青刺攢蠟毛。水面放花波底熟。森然赤手初莫近。誰料明珠藏滿腹。剖開膏液尙模糊。大盎磨聲風雨速。清泉活火曾未久。滿堂坐客分升掬。紛然咀噍惟恐遲。勢若羣雛方脫粟。東都每憶會靈沼。南國陂塘種尤足。東遊塵土未應嫌。此物秋來日常食。

【五言律詩】陶弼雞頭三伏池塘沸。雞頭美可烹。香囊聯錦破。玉指剝珠明。葉皺非蓮蓋。根甘似竹萌。不應徒適口。炎帝亦曾名。

【七言律詩】宋蘇轍食雞頭風開芡嘴鐵爲鬚。斧砍沙磨旋付廚。細嚼兼收上池水。徐嚙還成滄海珠。佳客滿堂須一斗。閑居賴我近平湖。多年不到會靈沼。氣味宛然初不殊。【原楊萬里食雞頭】江妃有訣煮眞珠。菰餅牛酥軟不如。手擘雞頭金五色。盤傾驪頰琲千餘。夜光明月供朝嚼。水府靈官恐夕虛。好與藍田食玉法。編歸辟穀赤松書。三危瑞露凍成珠。九轉丹砂鍊不如。鼻觀溫芳炊桂歇。齒根軟熟剝胎餘。半甌鷹爪中秋近。一炷龍涎丈室虛。却憶吾廬野塘畔。滿山柿葉正堪書。

【五言絕句】宋姜特立芡實芡實徧方塘。明珠截錦囊。風流薰麝氣。包裹借荷香。

【七言絕句】宋陸游建州絕無芡頗思之戲作鄉國雞頭買早秋。綠荷紅縷最風流。建州城裏西風

冷白棗堆盤看却愁。【原】楊萬里雞頭。龍宮失曉惱江妃也。養鳴雞報早暉。要啄稻梁無半粒。只教滿
額飽珠璣。

【詩散句】【釋】唐温庭筠。繡領金鬚盪倒光。團圓皺綠雞頭葉。【宋陳堯佐】風開黃芡鐵爲鬚。斧斫砂

磨旋出廚。【宋祁】磨沙漉水葶殼滑。斫桂煮釜風波聲。【原】梅堯臣。吳雞鬪罷絳幘碎。海蚌捧出真

珠明。【王巖叟】水晶冷浸碧玉叢。琉璃湧出青毛蝟。【鄭清之】玉質欲藏如許脆。鐵芒何苦太尖生。

【釋】唐韓愈。平池散芡盤。風能拆芡芡。【孟郊】鴻頭排刺芡。【原】宋黃庭堅。剝芡珠走盤。【釋】

【陸游】芡芡拆秋風。【元馬祖常】沼綠芡盤鋪。【宋黃庭堅】千頭剖蚌明珠熟。明珠論斗煮雞頭。

【原】陸游。雞頭纍纍如大珠。港種雞頭來滿船。【明王象明】雞頭新劈驪額顆。

【詞】【原】宋昭順老人浣溪沙。的皪堪爲席上珍。銀鑪百沸麝臍熏。蕭娘欲餌意中人。拈處玉纖籠蚌

顆。剝時瓊齒嚼香津。仙郎入口卽身輕。

【釋】【原】種植。秋間熟時。取實之老者。以蒲包包之。浸水中。三月間。撒淺水內。待葉浮水面。移栽淺水。每

科離二尺許。先以麻餅或豆餅拌勻河泥。種時以蘆記其根。十餘日後。每科用河泥三四碗壅之。【製

用】蒸熟。烈日中曝裂取仁。亦可春取粉。用新者煮食良。連殼一斗。防風四兩。煎湯浸用。甚軟美。經久不

壞。

藟臍

藟臍一名芍。一名臍苳。爾雅云芍臍苳。爾雅翼云一名臍苳。臍苳音訛也。一名黑三稜。一名地栗。皆形似也。

日用本草云小者為藟臍。大者為地栗。舊名烏芋。以形似芋而色烏也。今皆名藟臍。又臍苳。生淺水中。其苗三四月出土。一莖直上無

枝葉。狀如龍鬚。色正青。肥田生者。麤似細葱。高二三尺。其本白。藟秋後結根。大者如山查栗子。臍有聚毛。

纍纍下生入泥底。野生者黑而小。食之多滓。種出者皮薄。色淡紫。肉白而大。軟脆可食。【本草衍義】

皮厚。色黑。肉硬而白者。謂之豬藟臍。皮薄。澤色淡紫。肉軟而脆者。謂之羊藟臍。【園味甘】微寒。滑無毒。治

消渴。除胸實熱氣。作粉食。厚腸胃。療膈氣。消宿食。黃疸。治血痢。下血。血崩。辟蠱毒。消誤吞銅鐵。種宜穀雨

日。

【七言古詩】明王鴻漸題野苧薺圖。野苧薺。生稻畦。苦薺不盡心力疲。造物有意防民饑。年來

水患絕。五穀爾獨結。實何纍纍。

【五言絕句】明吳寬題苧薺畫冊。纍纍滿筐盛。大帶葑門土。咀嚼味還佳。地栗何足數。

【物類相感志】苧薺煮銅則軟。

慈姑

慈姑或作茨菰。一歲根生十二子。如慈姑之乳衆子。故名。爾雅翼云。歲有閏則生十三子。一名藉姑。一名水

萍一名河鳧苳。一名白地栗。根苗仍鳧苳。故有二名。苗名翦刀草。一名翦搭草。一名燕尾草。一名槎丫草。本草綱目云象葉形也。

莖榦似嫩蒲。又似三稜。苗甚軟。其色深青綠。每叢十餘莖。內抽出一兩莖。上分枝開小白花。四瓣。葉深黃色。根大者如杏。小者如栗。色白而瑩滑。五六月采葉。正二月采根。煮熟味甘甜。時人以作果。

【藥譜】七言律詩【譜】宋楊東山茨菰花【折來趁得未晨光。清露晞風帶月涼。長葉翦刀廉不割。小花茉莉淡無香。稀疏略糝瑤臺雪。升降常涵翠管漿。恰恨山中窮到骨。茨菰也遣入詩囊。

【詩散句】【譜】唐元稹【小片慈姑白。

【藥譜】原【種植】慈姑豫於臘月間。折取嫩芽。種於水田。來年四月盡。如種秧法種之。離尺許。田最宜肥。每顆花挺一枝。上開數十朵。色香俱無。惟根至秋冬取食甚佳。【製用】【本草】嫩莖可燂食。取汁可製粉。霜雌黃。

廣羣芳譜卷第六十七

果譜

甜瓜

圓甜瓜一名甘瓜。本草綱目云味甜於諸瓜故得甜甘之稱。一名果瓜。農書云供果者為果瓜以別於菜瓜也。北土中州種蒔甚多。二三月下種。

蔓生。葉大數寸。五六月花開黃色。六七月熟。其類甚繁。有團者。長者。尖者。扁者。大而徑尺者。小而一捻者。稜之。或有或無。色之。或青或綠。或黃斑糝斑。白路黃路。種種不同。甘肅甜瓜大如枕。皮瓢皆甘。勝於蜜。以皮曝乾。柔韌甘美而有味。浙中一種陰瓜。種宜陰處。秋熟。色黃如金。皮膚稍厚。藏至春食之。如新。○

【廣志】瓜之所出。以遼東廬江燉煌之種為美。有烏瓜。魚瓜。狸頭瓜。蜜筩瓜。女臂瓜。龍蹄瓜。羊髓瓜。縑瓜。瓜州大瓜如斛。御瓜也。有青登瓜。大如三斗魁。有桂枝瓜。長二尺餘。蜀地溫良。瓜冬熟。有春日瓜細小。小瓣宜藏。正月種。三月熟。有秋泉瓜。秋種。十月熟。形如羊角。色蒼黑。【農政全書】以狀得名。則有龍肝虎

掌兔頭狸首之稱。以色得名。則有白團黃瓢。白瓢小青大斑之別。其味總以甘美為上。○凡瓜大曰瓜。

小曰瓠。玉篇云。瓠。瓠子。曰瓠。肉曰瓢。瓠瓜實也。跗曰環。脫花處也。蒂曰寔。農書云。謂繫蔓處也。其畏麝。諸瓜皆同。

凡食瓜過多。但飲酒或水服麝。或食鹽花即消化。性寒滑無毒。少食止渴除煩熱。利小便。通三焦壅塞。夏

月中中暑多食動宿冷病破腹手足無力沉水及雙頂雙蒂者有毒不可食。

【詩豳風】七月食瓜。【大雅】縣縣瓜瓞。【爾雅】瓞瓞其紹瓞。【注】俗呼瓞瓜爲瓞紹者瓜

蔓緒亦著子但小如瓞。【禮記曲禮】爲天子削瓜者副之巾以絺爲國君者華之巾以綌爲大夫者

累之士寔之庶人齧之。【注】副析也既削又四析之乃橫斷之而巾覆焉華中裂之不四析也累保也謂

不巾覆也寔之不中裂橫斷去寔而已齧之不橫斷。【郊特牲】天子樹瓜華不斂藏之種也。【玉藻】

瓜祭上環。【注】上環橫切之圓如環也。【夏小正】五月乃瓜。【注】乃者急瓜之辭也瓜也者始食瓜也

【史記蕭相國世家】召平者故秦東陵侯秦破爲布衣貧種瓜於長安城東瓜美故世俗謂之東陵瓜

從召平以爲名也。【前漢書地理志注】燉煌杜林以爲古瓜州地生美瓜師古曰卽春秋左氏傳所云

允姓之戎居於瓜州者也其地今猶出大瓜長者狐入瓜中食之首尾不出。【晉書孝友傳】桑虞有園

在宅北數里瓜果初熟有人踰垣盜之虞以園棧多刺恐偷見人驚走而致傷損乃使奴爲之開道及偷

負瓜將出見道通利知虞使除之乃送所盜瓜叩頭請罪虞乃愷然盡以瓜與之。【宋書符瑞志】漢

安帝元初三年二月東平陵有瓜異處共生八瓜同蒂。漢桓帝建和二年七月河東有嘉瓜兩體共蒂

晉武帝太康三年六月嘉瓜異體同蒂生河南洛陽輔國將軍王濬園。宋孝武帝大明五年五月嘉

瓜生建康蔣陵里。明帝太始二年八月嘉瓜生南豫州。【南齊書竟陵王子良傳】子良禮才好上傾

意賓客。天下才學皆遊集焉。善立勝事。夏月客至。爲設瓜飲及甘果。【南齊書到攜傳】宋世上數遊會。攜家同從。明帝射雉郊野。渴倦。攜得早青瓜。與上對剖食之。上懷其舊德。意眇良厚。【孝義傳】韓靈敏早孤。與兄靈珍並有孝性。母尋又亡。家貧無以營凶。兄弟共種瓜半畝。朝採瓜子。暮已復生。以此遂辦塋事。【陳書儒林傳】鄭灼常蔬食。講授多。苦心熱。若瓜時。輒偃臥以瓜鎮心。起便誦讀。其篤志如此。【魏書宋瓊傳】瓊字普賢。少以孝行稱。母會病。季秋之月。思瓜不已。瓊夢想見之。求而遂獲。時人稱異。【魏書郭祚傳】郭祚領太子少師。曾從世宗幸東宮。肅宗幼弱。祚懷一黃鴈出奉焉。時人號爲黃鴈少師。【北齊書蘇瓊傳】瓊遷南清河太守。郡民趙穎曾爲樂陵太守。八十致仕歸。五月初得新瓜一雙。自來送。穎恃年老苦請。遂便爲留。仍致於廳事梁上。竟不剖。人遂競貢新果至門。聞知穎瓜猶在。相顧而去。【南史任昉傳】昉爲新安太守。卒於官。武帝聞問。方食西苑綠沉瓜。投之於盤。悲不自勝。【南史郭祖深傳】祖深常服故布襦素木案。食不過一肉。有姥餉一早青瓜。祖深報以匹帛。【孝義傳】郭平原以種瓜爲業。大明七年大旱。瓜瀆不復通船。縣令劉僧秀愍其窮老。下瀆水與之。平原曰。普天大旱。百姓俱困。豈可減溉田之水。以通運瓜之船。乃步從他道。往錢塘貨賣。【北史齊宗室傳】蘭陵武王長恭爲將。躬勤細事。每得甘美。雖一瓜數果。必與將士共之。【北史王羆傳】羆性儉率。不事邊幅。客與羆食瓜。客削瓜皮。侵肉稍厚。羆意嫌之。及瓜皮落地。乃引手就地取而食之。客甚愧色。【唐書

杜如晦傳】如晦既葬。帝他日食瓜美。輟其半奠焉。【武儒衡傳】儒衡遷中書舍人。時元稹因宦官知制誥。儒衡鄙厭之。會公堂食瓜。蠅集其上。儒衡揮以扇曰。適從何處來。遂集於此。一座皆失色。【陸贄傳】陸贄隨帝幸梁道。有獻瓜果者。常嘉其意。欲授以試官。贄曰。爵位天下公器。不可輕也。今獻瓜一器。果一盛。則授之。彼忘軀命者。有以相謂矣。曰。吾之軀命。乃同瓜果。瓜果草木也。若草木然。人何勸哉。【方技傳】四月帝憶瓜。明崇儼索百錢。須臾以瓜獻。曰。得之緱氏老人圃中。帝召老人問故。曰。埋一瓜失之。土中得百錢。【西域傳】末祿國有尋支瓜。大者十人食乃盡。【春秋元命苞】織女星主瓜果。【龍魚河圖】瓜有兩蒂兩鼻者殺人。【洞冥記】有龍肝瓜。長一尺。花紅葉素。生於冰谷。所謂冰谷素葉之瓜。仙人瑕丘仲採藥。得此瓜。食之。千歲不渴。瓜上恆如霜雪。刮嘗如蜜滓。及武帝封泰山。從者皆賜冰谷素葉之瓜。【吳越春秋】越王伐吳。吳王率羣臣遁去。因得生瓜已熟。吳王掇而食之。謂左右曰。何冬而生瓜。近道人。不食何也。左右曰。謂糞種之物。人不食也。吳王曰。何謂糞種。左右曰。盛夏之時。人食生瓜。起居道傍。子復生。秋霜惡之。故不食。【漢武外傳】西王母告上元夫人曰。共造朱火丹陵。食靈瓜。味甚好。憶此未久而已。七千歲矣。【新序】梁大夫有宋就者。嘗爲邊縣令。與楚隣界。梁之邊亭。與楚之邊亭。皆種瓜。各有數。梁之邊亭人。劬力。數灌其瓜。瓜美。楚人窺而稀灌其瓜。瓜惡。楚令因以梁瓜之美。怒其亭瓜之惡也。楚亭人惡梁亭之賢已。因往夜竊搔梁亭之瓜。皆有死焦者矣。梁亭覺之。因請其尉。亦欲竊往。

報搔楚亭之瓜。尉以請宋就。就曰：人惡亦惡，何褊之甚也？若我教子，必每暮令人往竊爲楚亭夜善灌其瓜，弗令知也。於是梁亭乃每暮夜竊灌楚亭之瓜。楚亭旦而行瓜，則又皆以灌矣。瓜日以美，楚亭怪而察之，則乃梁亭也。楚令聞之大悅，因具以聞楚王。楚王曰：此梁之陰讓也，乃謝以重幣，而請交於梁王。故梁楚之歡由宋就始。

【列仙傳】谿父者南郡甌人，居山間，間有仙人常止其家，從買瓜教之煉瓜子，與桂附積實共藏，而對分食之，二十餘年能飛走昇山入水。服闋者往來海邊諸祠中，見二仙人博賭瓜，使擔黃瓜數十頭，令瞑目，乃上方丈山。

【博物志】人以冷水自漬至膝，可頓啖數十枚瓜。漬至腰，啖搏多，至頸可啖百餘枚，所漬水皆作瓜氣。

【神仙傳】葛玄冬中能爲客設生瓜，夏致冰雪。介象常爲吳主種瓜菜百果，皆立生可食。

【祭法】夏祠秋祠皆用瓜。

【搜神記】吳時有徐光者，常行術於市里，從人乞瓜，其主勿與，便從索瓣杖地種之，俄而瓜生蔓延，生花成實，乃取食之，因賜觀者，嚮者反視所出賣，皆亡耗矣。

【拾遺記】漢明帝陰貴人夢食瓜甚美，帝使求諸方國，時燉煌獻異瓜種，瓜名穹隆，長三尺而形屈曲，味美如飴。父老云：昔道士從蓬萊山得此瓜，云是崆峒靈瓜。四劫一實，西王母遺於此地，世代遐遠，其實頗在。

須彌山有瓜如桂。

【孝子傳】焦華，西秦時人，父病甚，仲冬思瓜，求之不得，忽夢一人黃冠，謂曰：聞子父病思瓜，故送瓜以助子。華拜受之，及寤，瓜在手，馨香非常，父食而愈。

【晉錄】咸寧中，嘉瓜同蒂生於成都。

【異苑】晉武帝太康八年，王濟園生瓜三莖一實，孫鍾富春人，堅父也。

與母居。至孝篤性。種瓜爲業。忽有三年少。容服妍麗。詣鍾乞瓜。鍾爲設食。出瓜禮敬。慙。三人臨去。曰。我等司命郎。感君接見之厚。欲連世封侯。欲數世天子。鍾曰。數世天子。故當所樂。因爲鍾定墓地。出門悉化成白鵠。

【述異記】漢章帝元年前。上虞縣獻二蒂瓜。一實二蒂。瓜步在吳中。吳人賣瓜於江畔。用以名焉。吳桓王時。會稽生五色瓜。今吳中有五色瓜。歲充貢伏獻。

【列異傳】遼東丁伯昭。自說有客字次節。既亡。常爲本家致奇物。試臘月中。從索瓜。得美瓜數枚。

【黃庭經注】大霍山下有洞臺。司命君之府也。中有神盤靈瓜。食之心通至玄。

【南岳夫人內傳】夫人姓魏。名華存。性樂神仙。季冬夜半。有真人至靜室。陳玄室紫柰絳實靈瓜。

【經行記】大食國瓜大者名尋支。十餘人食一顆。輒亦足。越瓜長四尺以上。

【廣異記】謝玄卿見東華丈人。爲設空同靈瓜。

【白帖】漢哀帝二年。瓜異本同蒂。共生一實。時以爲嘉瓜。積石山有瓜。三年一實。

【酉陽雜俎】瓜惡香。香中尤忌麝。鄭注。太和初。赴職河中。姬妾百餘。盡騎香氣數里。逆於人鼻。是歲自京至河中。所過路瓜盡死。一蒂不獲。衛國縣西南有瓜穴。冬夏常出水。望之如練。時有瓜葉出焉。相傳苻秦時。有李班者。頗好道術。入穴中行。可三百步。廓然有宮。宇牀榻。上有經書。見二人對坐。鬚髮皓白。班前拜於牀下。一人顧曰。卿可還。無宜久住。班辭出。至穴口。有瓜數箇。欲取。乃化爲石。尋故道得還。至家。家人云。班去來已經四十年矣。

【杜陽雜編】滄浪洲產分蒂瓜。瓜長二尺。其色如椹。一顆二蒂。

【清異錄】洛南會昌中。瓜圃結五六實。長幾尺。而極大者。類蛾。

榴。故嗜果者目瓜爲百子瓊。遼東一處有瓜。若澆沃之。則以酒代水。實成破爲十段。每段中止有一子。而長數寸。食一顆可作十日糧。國人珍之。名獨子青。吳越稱書上瓜。錢氏子弟逃暑。取一瓜各言子之的數。言定剖觀。負者張宴。謂之瓜戰。瓜最盛者。無踰齊趙。車擔列市。道路濃香。故彼人云。未至舌交。先以鼻選。【續仙傳】馬湘有道術。嘗於江南刺史馬植坐上。以酒盃盛土種瓜。須臾引蔓生實。食之甚美。

【圖】集仙錄】花姑。女道士黃靈微也。昇化之後。座中奠瓜。數日生蔓。結實如桃者二焉。【國老談苑】趙世長以宗正鄉北使。時九月旣宴薦瓜。主客謂世長曰。此方氣候誠早。彼想未也。世長對曰。本朝來歲季夏。此味方盛。故知其節物晚也。【揮塵前錄】宣和中蔡居安提舉祕書省。夏日會館職於道山。食瓜居安令坐上徵瓜事。各疏所憶。每一條食一片。坐客不敢盡言。居安所徵爲優。欲畢。校書郎董彥遠連徵數事。皆所未聞。悉有據依。咸歎服之。識者謂彥遠必不能安。後數日果補外。【園聞見錄】呂文穆文正在龍門讀書。一日行伊水。見賣瓜者意欲得之。苦無錢。其人遺一枚。公悵然食之。後作相買園洛城東南下。直伊水。起亭名饅瓜。不忘舊也。【道學傳】褚雅與人共居。常取水洒掃。夏月種瓜。恣人來取。【明通紀】洪武五年六月。句容縣民獻嘉瓜二。同蒂而生。禮部尙書陶凱奏曰。禎祥實由聖德。上曰。朕寡德不敢當。且草木之祥。生於其土。亦惟其土人應之。與朕何與。若盡天地間時和歲豐。乃王者之禎祥也。

【學圃餘疏】甜瓜以香而小者爲第一。作黃綠二色。豈邵平所種五色子母瓜耶。今涼州塞外作乾條遺遠人。味極甘。當是此種。【帝京景物略】京師七夕。以瓜雕刻成花。謂之花瓜。【西湖志】杭州月塘皆沙田。土宜瓜。宋有周姓者。善種之。號周家瓜。

【表】唐柳宗元禮部賀嘉瓜表。臣某等。今日內出浙東觀察使賈全所進越州山陰縣移風鄉百姓

王獻朝園內產嘉瓜二實。同蒂圖示百寮者。寶祚維新。嘉瑞來應。式彰聖德。更表天心。臣某等誠慶誠賀。頓首頓首。伏惟皇帝陛下。保合太和。緝熙庶類。德馨上達。神化旁行。嘉瓜發祥。來自侯服。質惟同蒂。見車書之永均。地則移風。知化育之方始。雖七月而食。幽土歌王業之難。五色稱珍。東陵咏佳賓之會。未聞感通若斯昭著者也。臣等遭逢聖運。親仰珍圖。忭躍之誠。倍百恆品。

【賦】魏劉楨瓜賦並序。在曹植坐廚人進瓜。植命爲賦。促立成。其辭曰。布象牙之席。薰玳瑁之筵。憑彤玉之几。酌縹碧之尊。三星在隅。溫風節暮。枕翹於藤。流美遠布。黃花炳曄。潛實獨著。豐細異形。圓方殊務。揚暉發藻。九采雜糅。厥初作苦。終然允甘。應時湫熟。含蘭吐芳。藍皮密理。素肌丹瓢。乃命圃師。貢其最良。投諸清流。一浮一藏。析以金刀。四剖三離。承之以雕盤。羃之以織絺。甘逾蜜房。冷亞冰圭。【晉傅玄瓜賦】調土下種。播之有經。應運候時。負甲徐生。遂日就而月將。既成母而盤縈。次落莫之密葉兮。交透

蓮之修莖。敷碧綠之純朱。金華炳其朗明。育之以人功。養之以六氣。黃逾金細。青伴含翠。雖狸首之甘美。今未若東門之奇偉。舊有蜜筩及青括萸。嘉味溢口。鮮類寡儔。一齧之頃。至三搖頭。選美芳園。重簡其珍。披以吳刀。承以朱盤。中割而破。雖分若完。質兼五味。氣美芳蘭。愈得冷而益甘。兮。怡神爽而解煩。細肌密理。多瓢少瓣。豐旨絕異。食之不餽。【園】陸機瓜賦。佳哉瓜之爲德。邈衆果而莫賢。殷中和之淳祐。播滋榮於甫田。背芳春以初戴。迎朱夏而自延。奮修系之莫莫。延秀颺之綿綿。赴廣武以長蔓。粲烟接以雲連。感嘉時而促節。蒙惠露而增鮮。若乃紛敷雜錯。鬱悅婆娑。發彼適此。迭相經過。熙朗日以熠燿。扇和風其如波。有葛藟之覃及。相椒聊之衆多。發金榮於秀翹。結玉實於柔柯。蔽翠景以自育。綴修莖而星羅。夫其種族類數。則有括萸定陶。黃颺白搏。金文蜜筩。小青大斑。玄肝素椀。狸首虎蹯。東陵出於秦谷。桂髓起於巫山。五色比衆。殊形異端。或濟貌以表內。或惠心而醜顏。或據文而抱綠。或披素而懷丹。氣淇細而俱芬。體修短而必圓。芳郁烈其充堂。味窮理而不餽。德弘濟於饑渴。道殷流乎貴賤。若夫濯以寒水。淬以夏凌。越氣外歛。溫液密凝。體猶握虛。離若剖冰。【園】張載瓜賦。羊骹虎掌。桂枝蜜筩。玄表丹裏。呈素含紅。豐膚外偉。綠瓢內釀。甘相夏熟。丹奈冬芳。朱李零於桂圃。蒲萄潰於椒牀。雖茲肴之孤起。莫斯瓜之允臧。超椰子於南海。越橘柚於衡陽。若乃檳榔椰實。龍眼荔枝。徒以希珍難致爲奇。論實比德。孰大於斯。【嵇含瓜賦】世云三芝瓜則處全焉。故植根玉巖。潤葉飛泉。攬之者壽。食之者仙。是謂雲芝。芙蕖振采。擢莖

玄瀨闕二葩映莫此爲最是謂水芝。甘瓜普植用薦神祇其名龍膽其味亦奇是謂土芝。乃剖甘瓜既淳且馨荒者饗之忘困解醒流味通其五臟冷氣反其迷精。【梁張纘瓜賦】惟茲瓜之實茂體太素之純精翕玄潤於浮霄含皇澤於夏庭於是蒼春發歲天地交和乃啓沃壤是殖是播納佳種於畦畹應時運而芽剖揮萌散蘖栽葉負柯莠茸鬱蒼葦葦婆娑晞慶雲以吐蕤仰旭日之敷花朝晞重陽夕承朗月清露湛而宵降翔風穆以晨發振柯翹之繞若顧惠風以滋悅感靈化而細縕覩佳實之並結始懷微而苦發終感宮而甘通信不和而自馨與九鼎乎齊功蔓草是藉密葉是蔽潛湫獨熟墮莖落蒂芬馥酷烈氣暢雲際申狄不能詳其味隸首不能爲之計昔東陵之甘瓜美顯名於中古彼服閭之攸擔乃衆仙之所睹美人神之同好何厥用之弘普惟令實於無窮永可殖於靈圃。【原】唐康子玉瓜賦。巫山之岡秦川之陽垂條引蔓布綠敷黃彌臯被野含芬吐芳轉晨風之穆穆湛宵露之瀼瀼花葉則燁燁煒煒文彩則焜焜煌煌錦繡爲之失色霞日爲之奪光遠而望之粲兮爛繁星列兮曜長漢光色連延遙相煖迫而察之颺兮綿明璣盈蚌媚重泉大鱗巨介近相連細雨流風每飄飄兮葉上遊蜂戲蝶時歷亂於花前爾其大則三尺二升美則金漿玉實狸頭羊骸之字黃臚白搏之質感仙貴於孫鍾避世資於步隲異蒂表於前代同心彰乎曩日旣而橫綺席會嘉賓琴樽逸賞海陸具陳香分四座氣雜八珍旣取類於母子亦取辨乎君臣猗哉彼美流玩不已何以剖之金錯刀何以澆之玉英水邵平固植以著業阮籍托辭而興已

【文散句】**魏文帝與吳質書**浮甘瓜於清泉。【晉左思蜀都賦】瓜疇芋區。【梁昭明太子七召】瓜稱素腕之美。【唐柳宗元賀嘉瓜表】神瓜合形式表綿綿之慶。

【五言古詩】**唐張說寄姚司馬**共君春種瓜。本期清夏暑。瓜成人已去。失望將誰語。裊露滴香園。感味懷心許。偶逢西風便。因之寄鄂渚。【杜甫園人送瓜】江間雖炎瘴。瓜熟亦不早。柏公鎮夔國。滯務茲一掃。食新先戰士。其少及溪老。傾筐蒲鵠青。滿眼顏色好。竹竿接篲竇。引注來鳥道。沉浮亂水玉。愛惜如芝草。落刀嚼冰霜。開懷慰枯槁。許以秋蒂除。仍看小童抱。東陵跡蕪絕。楚漢休征討。園人非故侯。種此何草草。

【五言律詩】**唐李嶠咏瓜**欲識東陵味。青門五色瓜。龍蹄遠珠履。女臂動金花。六子方呈瑞。三仙實可嘉。終期奉絺綌。謁帝佇非賒。【孟浩然南山下與老圃期種瓜】樵牧南山近。林間北郭賒。先人留素業。老圃作鄰家。不種千株橘。惟資五色瓜。邵平能就我。開徑剪蓬麻。【宋楊萬里謝人餉新瓜】病骨那禁暑。衰年更作愁。有風依舊熱。初伏幾時秋。瓜葉誰新餉。饑涎小忍休。金盆井花水。且看玉雙浮。風露盈籃至。甘香隔壁聞。綠團嬰一捏。白裂玉平分。薜荔開冰段。梅山失火雲。老夫供晚酌。不用辦羶葷。【七言律詩】**宋黃庭堅食瓜有感**暑軒無物洗煩蒸。百果凡材得我憎。薜井筠籠浸蒼玉。金盤碧筯

薦寒冰。田中誰問不納履。坐上適來何處蠅。此理一盃分付與。我思明哲在東陵。【劉子翬謝人送

瓜】瓜疇暑雨亂花飛。美實蠲煩喜及時。蘇井筠籠香發越。金刀玉手翠離披。侯家昔見連阡盛。賈肆徒

誇厚貌奇珍。重故人分送意。臨風苑似對奇姿。呼兒急走送筠籃。敵暑惟應此物堪。一握青瑤含秀潤。

滿襟寒雪五清甘。搔園底用供鄰怨。剪棘聊應益盜慚。他日倘收遺瓣種。離離虎掌遍南山。

【五言絕句】園【宋范成大題甘瓜圖】夏膚粗已皺。秋蒂熟將脫。不辭抱蔓歸。聊慰相如渴。【趙山

臺甘瓜】冰泉浸綠玉。霜刃破黃金。涼冷消晚暑。清甘洗渴心。

【七言絕句】園【宋劉子翬致中惠瓜成一絕】故人夙有分瓜約。走送筠籃百里間。翠甌瓊罍纔一握。極

知風味勝黃斑。柘漿溜溜香浮玉。蘇水沉沉色弄金。那似甘瓜能破暑。一盤霜雪洗清襟。【范成大

田園雜興】晝出耘田夜績麻。村莊兒女各當家。童孫未解躬耕織也。傍桑陰學種瓜。【劉宰謝送

瓜】碧圓到眼舌生津。三載深慙拜賜頻。莫怪尊前最知味。東陵自是種瓜人。【花葉夫人宮詞】沉香

亭子傍池斜。夏日巡遊歇翠華。簾畔越盆盛淨水。玉人手裏剖銀瓜。【明李東陽畫瓜】玉盤秋露水精

寒。冰齒餘香嚼未殘。暑月爲君清到骨。不知身在畫中看。【張楷題畫瓜】翠實離離引蔓秋。西風涼

露滿林丘。東陵尚有閒田地。千載無人說故侯。【周良金】吾園亦在東門外。昨日清明手種瓜。不信邵

平能五色。吾園兼有武陵花。

【陶潛】邵生瓜田中。寧似東陵時。【唐杜甫】青門種瓜人。舊日東陵侯。【宋楊萬里】獨酌聖賢酒。新嘗子母瓜。【宋李待制】清泠冰有味。甘潤玉無漿。【唐王建】內園分得溫湯水。三月中旬已進瓜。【曹唐】路尋故舊過西谷。因得冰園一尺瓜。【宋楊億】銅盤瓊蕊三危露。素縷寒漿五色瓜。【明王寵】山田犂确苦多沙。學種東陵五色瓜。【周庚信】破壠夕瓜熟。甘瓜開蜜筒。【唐李嶠】破甘霜落瓜。【王灣】新味瓜初剖。【蕭穎士】隴瓜香早熟。【原】杜甫瓜。嚼水晶寒。【王維】金盤五色瓜。【韓愈】瓜畦爛文具。秋瓜未落蒂。澄澈甘瓜濯。【柳宗元】霜蔓絕寒瓜。【白居易】晚瓜有餘馨。【宋王安石】破瓜青玉美。【原】唐杜甫青門瓜地新凍裂。豈傍青門學種瓜。【李頎】玉盆貯水割甘瓜。【宋陸游】新瓜落刃冰盤裏。【元耶律楚材】午風涼處剖新瓜。【詞】原【宋馬莊父青門引】手種團團玉。香起日晴初熟。金刀錯落曉霜寒。十分風味。獨向暑天足。唐君去後雲空谷。異事傳流俗。刀圭倘是神仙藥。地皮捲盡猶飛肉。【原】鄭域百字令【東陵美景。有輕烟和月。斜風吹雨。一種龍鬚隨地轉。不學松蘿兒女。結實圓青。收來掌握。猶帶金盤露。拍浮金井。水花零亂飛舞。誰信六月飄霜。破開落刃。散銀絲金縷。冷碧淒香縈齒頰。洗我塵襟煩暑。村老吟詩。已公留客。此興無今古。安期非誕。世間有棗如許。

【別錄原】種植【二月上旬爲上時。三月上旬爲中時。四月上旬爲下時。至五六月止可種藏瓜耳。預將生數葉便結瓜者爲本母子。候熟蒂自落。取來截去兩頭。其中段子淘淨曝乾。收作種。臨種時用鹽水洗之。取熟糞土種之。仍將洗子鹽水澆之。得鹽氣則不籠死。坑深五寸。大如斗。納瓜子大豆各四粒。瓜生數葉。將豆掐去。瓜生至初花。鋤三四次。勿令生草。但鋤不可傷根。傷根則瓜苦。候秧拖時。掐去蔓心。再用熟糞培根下。僅澆灌。摘瓜勿令踏蔓。及翻覆之。踏則瓜爛。翻則瓜死。若生蟻。置骨其旁。引而棄之。【製用】瓜蒂一名瓜丁。一名苦丁香。凡使勿用白瓜蒂。要取青綠色團而短者良。瓜氣足時。其蒂自然落在蔓上。采得繫屋東有風處。吹乾用。【本草云】乃陽明經除濕熱之藥也。

西瓜

【原】西瓜一名寒瓜。蔓生。花如甜瓜。葉大多極缺。面深青。背微白。葉與莖皆有毛如刺。微細而硬。其稜或有或無。其色或青或綠或白。其形或長或圓。或大或小。其瓢或白或黃或紅。紅者味尤勝。其子或黃或紅。或黑或白。白者味更劣。其味或甘或淡或酸。酸者爲下。舊傳種來自西域。故名西瓜。今處處有之。薦福瓜出蘇州城南二十里。蔣市瓜牌樓市瓜出太倉州。一種陽溪瓜。秋生冬熟。形略長扁而大。瓢色如胭脂。味最美。可留至次年。云是異人所遺之種。味甘淡寒無毒。除煩止渴。消暑熱。療喉痺口瘡。解酒毒。子取仁可薦茶。皮可蜜煎糖煎醬醃。食瓜後。食其子。卽不噫瓜氣。以瓜割破。曝日中。少頃食之。頗涼。收藏得法。可至

來年春夏近糯米及酒氣則易爛。猫踏之其瓢便沙。

【梁書孝行傳】勝曇恭年五藏。母楊氏患熱思食寒瓜。土俗所不產。曇恭歷訪不能得。銜悲哀切。俄值一桑門。問其故。曇恭具以告。桑門曰。我有兩瓜。分一相遺。曇恭拜謝。因捧瓜還。以薦其母。舉室驚異。尋訪桑門。莫知所在。

【五代史】蕭翰北歸。有胡嶠爲翰掌書記。隨入契丹。周廣順三年。亡歸中國。略能道其所見。云自上京東去四十里。至眞珠寨。始食菜。明日東行。地勢漸高。西望平地。松林鬱然。數十里。遂入平川。多草木。始食西瓜。云契丹破回紇得此種。以牛糞覆棚而種。大如中國冬瓜。而味甘。【松漠紀聞】西瓜形如扁蒲而圓。色極青翠。經歲則變黃。其瓠類甜瓜。味甘脆。中有汁尤冷。洪皓出使攜以歸。今禁圃鄉圃皆有。亦可留數月。但不能經歲。仍不變黃色。鄱陽有久苦目疾者。曝乾服之而愈。蓋其性冷故也。【事物紀原】中國初無西瓜。洪忠宣使金。貶遞陰山。得食之。其大如斗。絕甘冷。可蠲暑疾。【石

湖詩註】西瓜味淡而多液。本燕北種。今河南皆種之。【眞臘風土記】疏菜有西瓜。【丹鉛總錄】余嘗疑本草瓜類中不載西瓜。後讀五代郃陽令胡嶠陷北記云。嶠於回紇得瓜種。以牛糞種之。結實大如斗。味甘。名曰西瓜。是西瓜至五代始入中國也。文選浮甘瓜於清泉。蓋指黃瓜甜瓜也。【本草】陶弘景註瓜蒞云。永嘉有寒瓜。甚大。可藏至春者。卽西瓜也。則五代之先。瓜種已入浙東。但無西瓜之名。及徧於中國耳。【瀛涯勝覽】蘇門答刺國有西瓜。綠皮紅子。長二三尺。鞞鞞國西瓜甜瓜。一枚用二人舉之。

古里國西瓜四時皆有。【蜀都雜抄】金王子可南云。咏西瓜云。一片冷裁潭底月。六灣斜捲隴頭雲。又在元世祖前矣。

【七言律詩】元方夔食西瓜恨無纖手削。馳峯醉嚼寒瓜一百筩。縷縷花衫沾唾碧。痕痕丹血搯膚紅。香浮笑語牙生水。涼入衣襟骨有風。從此安心師老圃。青門何處問窮通。【明李東陽汝賢饋西瓜及檳榔】漢使西還道路賒。至今中國有靈瓜。香浮碧水清先透。片逐鸞刀巧更斜。飽德未忘蒙正饋。爲園翻愧老樊家。因君解取南閩俗。更說檳榔可代茶。

【七言絕句】宋范成大西瓜園碧蔓凌霜臥軟沙。年來處處食西瓜。形模瀟灑落淡如水。未可葡萄苜蓿誇。

【種植】秋月擇其瓜之嘉者。留子曬乾。收作種。欲種瓜地。耕熟。加牛糞。至清明時。先以燒酒浸瓜子。少時取出。漉淨。拌灰一宿。相離六尺。起一流坑。用糞和土瘞之。於四周中留鬆土。種子其中。不得復移。瓜易活而甘美。栽宜稀。澆宜頻。糞宜多。蔓短時作綿九。每朝取蟲。恐食蔓。長則已。頂蔓長至六七尺。則掐其頂心。令四旁生蔓。欲瓜大者。每科揀其端正旺相者。止留一瓜。餘蔓花皆掐去。則實大而味美。性畏香。尤忌麝。麝觸之。乃至一顆不收。【防害】紀明齋任汝寧。園戶獻一瓜。甚大。公異之。園戶曰。往未有此大。公曰。吾聞物之異常者有毒。令一隸往觀之。根下有蜈蚣數十。遂棄其瓜。延壽書云。陳逢原避暑。食瓜。

過多。至秋忽腰腹痛。不能舉動。商助治療之。乃愈。大抵瓜性寒。北人秉壯。食之無害。南人秉弱。食之遂成瀉痢。寒胃忌之。

附錄
北瓜

北瓜形如西瓜而小。皮色白。甚薄。瓢甚紅。子亦如西瓜而微小。狹長。味甚甘美。與西瓜同時。想亦西瓜別種也。

附錄
石瓜

烏撒軍民府土產石瓜。樹生。堅如石。善治心痛。益部方物略記。石瓜生蛾眉山中。樹端挺。葉肥滑如冬青。甚似桑花。色淺黃。實長不圓。殼解而子見。以其形似瓜。故里人名之。煮爲液。黃能治瘰。

宋宋祁石瓜贊。修幹澤葉。結實如綴。膚解核零。可用治瘰。

劉子

爾雅。劉劉杙。注。劉子生山中。實如梨。酢甜。核堅。出交趾。南方草木狀。劉樹子大如李實。味酢。養蜜藏之。仍自好。荆揚異物志。劉子樹生交廣武平興古諸郡山中。三月著花。結實如梨。七八月熟。色黃味甘酢。而核甚堅。

不周山果

【增】山海經】不周之山有嘉果。子如棗。黃如桃。黃花赤樹。食之不飢。

如何樹實

【增】神異經】南方大荒有樹焉。名曰如何。三百歲作華。九百歲作實。華色朱。其實正黃。高五十丈。敷張如蓋。葉長一丈。廣二尺餘。似菅苧。色青。厚五分。可以絮。如厚朴。材理如支九。子味如飴。實有核。形如棗。子長五尺。圍如長金刀。剖之則酸。蘆刀剖之則辛。食之者地仙。不畏水火。不畏白刃。

【增】啓蒙記】如何隨刀而改味。或曰。此卽仙經所謂火棗。

平仲

【增】漢書注】櫛平仲木也。亦云火棗木。一云玉精。食其子得爲神仙也。

【增】賦散句】漢司馬相如上林賦】華楓櫛櫛。【晉左思吳都賦】平仲之木。實白如銀。

【詩散句】唐沈佺期】芳春平仲綠。清夜子規啼。

繫彌子

【增】廣志】繫彌子狀圓而細。赤如軟棗。其味初苦後甘。可食。

都咸子

【增】南方草木狀】都咸樹出日南。三月生花。仍連著實。大如指。長三寸。七八月熟。其色正黑。【南州記】

其樹如李子。大如指。取子及皮葉。曝乾作飲。極香美。【本草綱目】陳藏器曰。子及皮葉。氣味甘平。無毒。主治火乾作飲。止渴潤肺。去煩除痰。李珣曰。去傷寒清涕。效逆上氣。宜煎服之。

千歲子

【南方草木狀】千歲子有藤蔓出土。子在根下。鬚綠色。交加如織。其子一苞二百餘顆。皮殼青黃色。殼中有肉如栗。味亦如之。乾者肉殼相雜。撼之有聲。似肉荳蔻。出交趾。

【廣志】【增】三輔黃圖。漢武帝元鼎六年。破南越。起扶荔宮。以植所得奇草異木。龍眼荔支檳榔橄欖千歲子甘橘。皆百本。

人面子

【增】南方草木狀。人面子樹似含桃。結子如桃實。無味。核正如人面。故以爲名。以蜜漬之。稍可食。其核可翫。出南海。【寰宇記】人面木春花夏實秋熟。皮味甘酸。實有核如胡桃。兩邊似人面。

【集韻】七言絕句。【增】宋楊萬里人面子。喜時能笑醉能歌。眉映青山眼映波。舊日美如潘騎省。只今瘦似病維摩。

夫編子

【南方草木狀】夫編樹野生。三月花。仍連著實。五六月成子。及熟。煮投下魚鷄鴨羹中好。亦中鹽藏。出

交趾武平。

五斂子

【釋】南方草木狀】五斂子大如木瓜。黃色。皮肉脆軟。味極酸。上有五稜如刻出。南人呼稜爲斂。故以爲名。以蜜漬之。甘酢而美。出南海。【本草】閩中人呼爲陽桃。形甚詭異。其核如柰。五月熟。一樹可得數石。十月再熟。蜜漬之美。俗亦曬乾。以充果食。

都昆子

【釋】南方草木狀】都昆樹野生。二月花。仍連著實。八九月熟。如雞卵。里民取食之。皮核滋味酢。出九真交趾。

椰子

【釋】本草】椰子一名胥餘。司馬相如上林賦。一作胥餘。一作胥耶。一名越王頭。俗謂之越王頭。【南方草木狀】椰樹葉如栝櫚。高六七丈。無枝條。其實大如寒瓜。外有粗皮。皮次有殼。圓而且堅。剖之有白膚。厚半寸。味似胡桃。而極肥美。有漿。飲之得醉。【寰宇記】椰子樹似檳榔而高大。葉長一尺。無陰。結實一房。生三十餘子。如瓜。其殼中有白如熊白。內有漿一升。清如水。甜如蜜。飲之愈渴。疾。殼堪爲酒壺。皮堪縛船。土人多種之。【本草】蘇頌曰。椰子嶺南州郡皆有之。寇宗奭曰。椰子開之有汁。白色如乳。如酒極香。別是一種氣味。強名

爲酒中有白瓠形圓如栝樓上起細壠亦白色而微虛其紋若婦人裙褶味亦如汁與薯殼一層白肉皆可糖煎爲果其殼爲酒器如酒中有毒則酒沸起或裂破李時珍曰木至斗大方結實大者三四圍高五六丈二月開花成穗出於葉間長二三尺大如五斗器仍連著實一穗數枚六七月熟其殼磨光有斑纈點紋橫破之可作壺爵縱破之可作瓢杓

【唐書南蠻列傳】環王取椰葉爲席【神異經】東南荒中有邪木高三十丈或十餘圍或七八尺其枝喬直上不可卹也葉如甘瓜二百歲葉落而生花花形如甘瓜花復二百歲落盡而生萼萼下生子三歲而成熟成熟之後不長不減子形如寒瓜長七八寸徑四五尺萼復覆生頂此不取萬世如故若取子而留萼萼復生子如初年月復成熟復二年則成萼而復生子其子如甘瓢少覩甘美食之令人身澤不可過三升令人冥醉半日乃醒木高人取不能得惟木下有多羅之人緣能得之一名無葉世人後生不見葉故謂之無葉也一名倚驕【南方草木狀】昔林邑王與越王有故怨遣俠客刺得其首懸之於樹俄化爲椰子林邑王憤之命剖以爲飲器南人至今效之當刺時越王大醉故其漿猶如酒云【齊東野語】今人以椰子漿爲椰子酒而不知椰子花可以釀酒唐殷堯封寄嶺南張明府詩云椰花好爲酒誰伴醉如泥【廣東志】茂名縣高力士宅在縣西力士縣人馮盎之孫故有宅嘗手植枯椰子二株高百尺宋時尙存【廣東新語】瓊人每以檳榔代茶椰代酒以款賓客謂椰酒久服可以烏鬚

【賦散句】漢司馬相如上林賦。留落胥餘。【晉左思吳都賦】椰葉無陰。

【五言古詩】宋梅堯臣李獻甫於南海魏侍郎得椰子見遺。魏公番禺歸。逢子蕪江口。贈以越王頭。還同月支首。割解爲飲器。津漿若美酒。我獨愧先生。饌致崇師友。應知愈饑渴。況是懷思久。【張子翔椰子樹】矮胡生南方。托生碧山崖。採擇供貢筐。扶杖上天街。愧此原慙姿。欲售久未諧。道旁麴先生。風味固自佳。逢渠卽傾蓋。輸寫能開懷。刮削出光采。規繩去欹窳。金玉豈足貴。膠漆真吾儕。客來有嘉招。二士往必偕。婆娑止坐隅。共饋煩金斂。矮頭雖木強。醇德真無涯。虛心實其腹。居然外形骸。微物幸見用。棄置理則乖。毛穎有封國。陶匏薦煙柴。大藥起世痾。炮燔及根莖。願子自洗濯。勿受塵埃埋。暇日肯相從。醉經生高齋。

【五言律詩】唐沈佺期題椰子樹。日南椰子樹。杳裊出風塵。叢生調木首。圓實檳榔身。玉房九霄露。碧葉四時春。不及塗林果。移根隨漢臣。

【七言絕句】宋黃庭堅椰子。漿成乳酒醺人醉。肉截鷓肪上客盤。有核如匏可雕琢。道裝宜作玉人冠。

【詩散句】元何中。歸馬駝椰子。濩落魏瓠垂。絢華殼初剖。濯濯膾玉肥。【宋黃庭堅】碩果不食寒林梢。剖而器之如懸匏。【唐張諤】椰子日南枝。【張籍】椰葉瘴雲濕。

【海槎餘錄】椰子樹初栽時用鹽一二斗先置根下則易發。

附錄 青田核

【古今注】烏孫國有青田核狀如桃核不知其樹核大如數斗剖之盛水則變酒味甚醇美飲盡隨即注水隨盡隨成但不可久久則苦澁謂之青田酒漢末蜀王劉璋得之【酉陽雜俎】一名青田壺。

附錄 嚴樹

【一統志】瓊州有嚴樹搗其皮葉浸以清水和以粳釀或入石榴花葉數日成酒能醉人。

州樹子

【南州記】州樹野生二月花連著實如李子五月熟剝核食之味甜出武平。

國樹子

【南州記】國樹子如鴈卵野生三月花連著實九月熟曝乾剝殼取食之味似栗出交趾。

前樹子

【南州記】前樹野生二月花仍連著實如手指長三寸五六月熟以湯滴之削去核食以糟鹽藏之味

辛可食出交趾。

都桷子

按南方草木狀廣志交州記俱作桶子本草拾遺又作構子與楮構之構名同實異

【南州記】都桷子生廣南山谷。樹高丈餘。二月開。花連著實。大如雞卵。七月熟。【魏王花木志】都桷樹出九真交趾。野生。花赤色。子似木瓜。里民取食之。味酢。以鹽酸漚食。或蜜藏。皆可。

榘樹子

【南州記】榘樹子如桃。實長寸餘。二月花連著實。五月熟。色黃。鹽藏。味酸。似白梅。出九真。

韶子

【廣州記】韶葉如栗。赤色。子大如栗。有刺棘。破其皮內有肉如豬肪。着核不離。味甘酢。核如荔枝。【桂海虞衡志】山韶子夏熟。色紅。肉如荔枝。藤韶子秋熟。大如鳧卵柿。

五子

【廣州記】五子樹實如梨。裏有五核。因名五子。

白緣子

【交州記】白緣樹高丈餘。實味甘。美於胡桃。

多感子

【交州記】多感子黃色。圍一寸。

蕉子

【增】交州記】蕉子如瓜大亦似柚。

彌子

【增】交州記】彌子圓而細其味初苦後甘。

蜜桃

【增】臨海異物志】梅桃子生晉安侯官縣。一小樹得數拾石實大三寸可蜜藏之。

揚搖子

【增】臨海異物志】揚搖有七脊子生樹皮中其體雖異味則無奇長四五寸色青黃味甘。

冬熟

【增】臨海異物志】冬熟如指大正赤味甘勝梅。

猴鬪子

【增】臨海異物志】猴鬪子如指頭大其味小苦可食。

關桃子

【增】齊民要術】關桃子其味酸。

土翁子

【增】齊民要術】士翁子如漆子大。熟時甜酸。其色青黑。

枸槽子

【增】齊民要術】枸槽子如指頭大。正赤。其味甘。

猴總子

【增】齊民要術】猴總子如小指頭大。與柿相似。其味不減於柿。

多南子

【增】齊民要術】多南子如指大。其色紫味甘。與梅子相似。出晉安。

王壇子

【增】齊民要術】王壇子如棗大。其味甘。出侯官。越王祭太乙壇。邊有此果。無知其名。因見生處。遂名王壇。其形小於龍眼。有似木瓜。

探子

【增】荆楊異物志】探子樹南越丹陽諸郡山中皆有之。其實如梨。冬熟味酢。【本草拾遺】探子似梨生江南。左思吳都賦。探榴禦霜是也。

都念子

【大業拾遺錄】南海郡送都念子樹一百株。勅付西苑十六院內種。此樹高一丈許。葉如白楊。枝柯長細。花心金色。花葉正赤。似蜀葵而大。其子小於柿子。甘酸至美。蜜漬爲粽。益佳。【嶺表錄異】倒捻子花似蜀葵小。而深紫。南中婦女多用染色。子如軟柿。外紫內赤。無核。頭上有四葉如柿蒂。食者必捻其蒂。故謂之倒捻子。或訛呼都念子。今又訛念爲撚。或又作粘。【東坡雜記】吾謫居南海。以五月出陸。至滕州。自滕至儋。野花夾道。如芍藥而小。紅鮮可愛。樸檉叢生。土人云。倒粘子花也。至儋則已結子。爛紫可食。殊甘美。中有細核。嚼之瑟瑟有聲。亦頗苦澁。童兒食之。使大便難。野人夏秋痢下。食葉輒已。海南無柿。剝浸揉攪之以代柿油。蓋愈於柿也。因名之曰海漆。

侯騷

【酉陽雜俎】侯騷蔓生。子如雞卵。既甘且冷。輕身消酒。

仙樹實

【酉陽雜俎】祁連山有仙樹實。行旅得之。止饑渴。一名四味木。其實如棗。以竹刀剖則甘。鐵刀剖則苦。木刀剖則酸。蘆刀剖則辛。

【酉陽雜俎】西河舊事。祁連山有仙樹。人行山中。以療飢渴者。輒得之飽。不得持去。平居亦不得見。

蠶齊子

【西陽雜俎】蠶齊子如彈丸。魏武帝常啖之。

無石子

【西陽雜俎】無石子出波斯國。波斯呼爲摩賊。樹長六七丈。圍八九尺。葉似桃葉而長。三月開花白色。花心微紅。子圓如彈丸。初青。熟乃黃白。蟲食成孔者正熟。皮無孔者入藥用。其樹一年生無石子。一年生。跋屢子人如指長三寸。上有殼。中仁如栗。黃可噉。

婆羅婆

【西陽雜俎】婆羅婆樹。其實如瓊。

磐柰穠樹

【西陽雜俎】磐柰穠樹。出波斯國。亦出拂林國。拂林呼爲羣漢。樹長三丈。圍四五尺。葉如細榕。經寒不凋。花似橘。白色。子綠。大如酸棗。其味甜膩可食。西域人壓爲油。以塗身。可去風痒。

齊墩

【西陽雜俎】齊墩樹。出波斯國。亦出拂林國。拂林呼爲齊廬。樹長二三丈。皮青白。花似柚。極芬香。子似楊桃。五月熟。西域人壓爲油。以煮餅菓。如中國之用。巨勝也。

那核婆

【北戶錄】那核婆果出印度。大如冬瓜。熟則果赤。剖之中有十小果。大如雞卵。更又破之。其汁黃赤。其味甘美。或在樹枝。如衆果之結實。或在樹根。如茯苓之在土。

猪肉子

【寰宇記】端溪縣有樹冬榮。其子號曰猪肉子。大如杯。其肉如肪。炙而食之。味似猪肉。至美。故名。

黎檬子

【桂海虞衡志】黎檬子形如大梅。復似小橘。味極酸。

【東坡雜記】黎檬字希聲。爲人質木遲緩。劉貢父戲之爲黎檬子。以謂指其德。不知果木中真有此也。一日聯騎出。聞市人有唱是果鬻之者。大笑。幾落馬。

櫓罌子

【桂海虞衡志】櫓罌子大如半升碗。諦視之。數十房攢聚成毬。每房有縫。冬生青。至夏紅。破其瓣食之。微甘。

槎擦子

【桂海虞衡志】槎擦子如錐栗。肉甘而微澁。

火炭子

【桂海虞衡志】火炭子如烏李。

部諦子

【桂海虞衡志】部諦子色黃，如大石榴。

木賴子

【桂海虞衡志】木賴子如淡黃大李。

羅晃子

【桂海虞衡志】羅晃子如橄欖，其皮七重。

古米子

【桂海虞衡志】古米子殼黃，中有肉如米粒。

殼子

【桂海虞衡志】殼子如青梅味甘。

藤核子

【桂海虞衡志】藤核子生白藤上，如小蒲桃。

木連子

【桂海虞衡志】木連子如胡桃紫色。

羅蒙子

【桂海虞衡志】羅蒙子黃如大橙柚。

特乃子

【桂海虞衡志】特乃子狀似榧而圓長端正。

羊矢子

【桂海虞衡志】羊矢子色狀全似羊矢。味亦不佳。

日頭子

【桂海虞衡志】日頭子狀如櫻桃。纍纍如蒲桃穗。

秋風子

【桂海虞衡志】秋風子色狀俱似棟子。

黃皮子

【桂海虞衡志】黃皮子如小棗。

朱圓子

【增】桂海虞衡志朱圓子正圓深紅狀如棗子。

粉骨子

【增】桂海虞衡志粉骨子皮黃色如粉。

塔骨子

【增】桂海虞衡志塔骨子匾如大橘皮裏空虛。

布衲子

【增】桂海虞衡志布衲子似李而黃。

黃肚子

【增】桂海虞衡志黃肚子如小石榴。

鹽麩子

【增】本草鹽麩子一名五構一名鹽膚子一名鹽梅子一名鹽棗子一名天鹽生吳蜀山谷蜀人謂之酸桶戎人謂之木鹽樹狀如椿七月子成穗粒如小豆上有鹽似雪可爲羹用南人取子爲末食之酸鹹止渴。

【增】山海經橐山多構木【注】今蜀中有構木七八月中吐穗穗成如有鹽粉著狀可以酢羹。

胡頹子

【本草】胡頹子一名雀兒酥。雀兒喜食之也。越人呼爲蒲頹子。南人呼爲盧都子。吳人呼爲半含春。言早熟也。襄漢人呼爲黃婆爛。象乳形也。樹高丈餘。冬不凋。葉色白。冬花。春熟最早。小兒食之當果。又有一種大相似。冬凋。春花。立夏時熟。圓如櫻桃。人呼爲木半夏。吳越人呼爲四月子。亦曰野櫻桃。

附錄
山茱萸

【本草】山茱萸一名蜀酸棗。一名肉棗。一名魁實。一名雞足。一名鼠矢。樹高丈餘。葉似榆。花白色。子赤色。如胡頹子。亦可噉。與茱萸絕不相類。

醋林子

【本草】醋林子生四川邛州山野林箐中。木高丈餘。枝葉繁茂。三月開白花。四出。九月十月子熟。纍纍數十枚成朶。生青熟赤。略類櫻桃。而帶短。土人以鹽醋收藏充果食。其葉味醋。夷獠人采得入鹽和魚鱗食。云勝用醋也。

蓬蓬柰

【廣東志】蓬蓬柰。猶言破肚子。蓋果實也。產於暹羅。如大棗而青。烏人日乾以致遠。漬以沸湯。其皮自脫。圓滿如大李肉。潤膩如紅酥。甘美可啖。

抹猛果

【雲南志】抹猛果樹高丈餘。大如掌。熟於夏月。味甘。出元江府。

枸柰子

【盛京志】枸柰子味酸。色紅。而實小。俗呼狗嬾子。

稠梨子

【盛京志】稠梨子實黑而澁。土人珍之。間以作麪。暑月調水服之。云可止瀉。

桃花水

【盛京志】桃花水實紅而味甘。質輕脆。烏喇寧古塔有之。

法佛哈

【盛京志】法佛哈實如小杏。酸甜。寧古塔所出。

米孫烏什哈

【盛京志】米孫烏什哈實味酸。出寧古塔。

烏喇柰

【烏喇柰塞外紅果也。烏喇帶之地尤多。一名歐李。實似櫻桃而大。味甘微酸。然不可多食。

烏沙爾器

烏沙爾器生塞外。樹高數尺。秋結紅果一枝。纍纍千百顆。狀如櫻桃而小。可食。其味酸苦。

無花果

無花果一名映日果。一名優曇鉢。一名阿駟。西陽雜俎云波斯人呼爲阿駟。拂林人呼爲底珍樹。一名蜜果。最易生。插條卽活。在處有之。三月發葉。樹如胡桃。葉如楮。子生葉間。五月內不花而實。狀如木饅頭。生青熟紫。味如柿而無核。人家宅園。隨地種數百本。收實可備荒。其利有七。實甘可食。多食不傷人。且有益。尤宜老人小兒。一也。乾之與乾柿無異。可供籩實。二也。六月盡取次成熟。至霜降。有三月常供佳實。不比他果。一時採擷都盡。三也。種樹十年取效。桑桃最速。亦四五年。此果截取大枝扦插。本年結實。次年成樹。四也。葉爲醫痔勝藥。五也。霜降後未成熟者採之。可作糖蜜煎果。六也。得土卽活。隨地可種。廣植之。或鮮或乾。皆可濟饑。以備歉歲。七也。

【倦游錄】木饅頭。京師亦有之。謂之無花果。狀類小梨。中空。旣熟色微紅。味頗甘酸。食之大發瘡。嶺南尤多。州郡待客多取爲茶牀高釘。故云公筵多釘木饅頭。或謂嶺南諸州刻木作饅頭狀。底刻字云。大中祥符年一牒造三十隻。談者之誤也。

【扦插】春分前取條長二三尺者。插土中。上下相半。常用糞水澆。葉生後純用水忌糞。恐枝葉大

盛易摧折。結實後不宜缺水。當置瓶其側。出以細露。日夜不絕。果大如甌。【製用】採青果用鹽漬壓扁日乾。可充果實。小者用糖煎蜜煎。可以久留。

文光果

原文光果形如無花果。肉味如栗。五月成熟出景州。

天仙果

原天仙果樹高八九尺無花。其葉似荔枝而小子如櫻桃。纍纍綴枝間。六七月熟。味至甘。

集藻【贊】宋宋祁天仙果贊。有子孫枝。不蘄而實。薄言采之。味埒蜂蜜。

槃多樹

原槃多樹不花而結實。實從皮中出。自根著子至杪。如橘大。

古度子

原古度子樹葉如栗。不花而實從枝中出。大如石榴與檀子。色赤味酸。煮爲粽食。若數日不煮。化作飛蟻。穿皮飛去。出交廣諸州。

廣考【廣州記】熙安縣有孤古度樹。俗人無子。於祠炙其乳則生男。以金帛報之。

波羅蜜

【桂海虞衡志】波羅蜜大如冬瓜。外膚礪礪如佛髻。削其皮食之。味極甘。【本草】安南人名曇伽結。波斯人名婆那娑。佛林人名阿薩驪。生交趾南番諸國。今嶺南滇南亦有之。樹高五六尺。樹類冬青。而黑潤倍之。葉極光淨。冬夏不凋。樹至斗大方結實。不花而實出於枝間。多者十數枚。少者五六枚。大如冬瓜。外有厚皮裹之。若栗毬。上有軟刺。五六月熟時。顆重五六觔。剝去外皮殼。內肉層疊如橘囊。食之味至甜美。如蜜。香氣滿室。一實凡數百核。核大如棗。其中仁如栗黃。煮炒食之甚佳。果中之大者。惟此與椰子而已。

優曇鉢

【一統志】優曇鉢出肇慶府。似琵琶。無花而實。

無患子

【博物志】無患子葉似柳。核堅。正黑。可作香纓。【酉陽雜俎】無患木燒之極香。辟惡氣。一名噤婁。一名桓。【通雅】榭子實可去垢。核黑如檠。一名無患子。【本草】無患子一名肥珠子。一名油珠子。釋家取爲經珠。謂之菩提子。生高山中。樹甚高大。枝葉皆如椿。特其葉對生。五六月開白花結實。大如彈丸。狀如銀杏。及苦楝子。生青熟黃。老則文皺。黃時肥。如油燻之形。味辛。氣腫且硬。其蒂下有二小子相粘承之。實中一核。堅黑似肥皂莢之核。而正圓如珠。殼中有仁如榛子仁。亦辛腫可炒食。十月采實。煮熟去核。搗

和麥麪或豆麪作澡藥去垢同於肥皂用洗真珠甚妙。

【山海經】祿周之山其木多桓。【崔豹古今注】拾樞木一名無患者昔有神巫名曰寶眊能符劾百鬼得鬼則以此爲棒殺之世人相傳以此木爲衆鬼所畏競取爲器用以却厭邪鬼故號曰無患也。

【九域志】象州歲貢榘子念株十串。

【贊】齊下敬宗無患枕贊爰茲素朴名爲吉始匠人斯製以獻君子。

【五言律詩】唐包何同李郎中淨律院榘子樹。木榘稀難識沙門種則生。葉殊經寫字子爲佛稱名。濾水澆新長燃燈暖更榮。亭亭無別意只是勸修行。

菩提子與木譜菩提樹前木榘子名同物異。

【天臺志】山有菩提樹相傳西天梵僧遊化遺此種樹如柿花亦大同未結葉先乃別抽一葉長指半許闊兩指色白而光潤乃結葉於葉下日則覆子以蔽穢夜則捧子以承露秋社後取子爲珠十百中必有一二如羅漢者謂之佛頭他處所生則無之。

不納子

【桂海虞衡志】不納子似黃熟小梅絕易爛爛卽破肉附核可爲經珠似菩提子。

鬼見愁

【附】本草】鬼見愁出武當山中。是樹莢之子。其形正如刀豆子而色褐。彼人以穿數珠。

欒華

【附】本草】欒華樹葉似木樨而薄細。花黃似槐而稍長大。子殼似酸漿。其中有實如熟豌豆。圓黑堅硬。堪爲數珠。五月六月花可收。南人以染黃。甚鮮明。

附錄 念珠樹

【附】雲南志】念珠樹出大理府。每穗結實一百八枚。

文官果

【附】文官果樹高丈餘。皮粗多礪。木理甚細。堪作器物。葉似榆而尖長。周圍鉅齒。紋深。春開小白花成穗。花五瓣。每瓣當中微凹。有紅筋貫之。蒂下有小青托。花落結實。大者如拳。一實中數隔。間以白膜。仁如馬檳榔無二。裹以白軟皮。大如指。頂去白皮。食其仁甚清美。多雨及勤澆則實成者多。若遇旱則實糝小而不成。【附】其果一苞中藏多子。子多白色。紋旋轉如卷蕉。味甘香如嫩蓮葯。

